


**UBWO ODADA
BWUH
UHYEH-OGBA**



UBWO ODADA BWUH UHYEH-OGBA

“UBWO ODADA BWUH UHYEH—OGBA” rih ala i-tu gwurwuh bwuh am bwuh aleh, bwuh epwu nya Upwu Igogo u-uhyeh nya ang imeje dati dati ilepwu nya Upwu Igogo ayidang. M mi onu yekee, Upwu Igogo ayidang ubwoomwu a rih upwu ole ko jé wule ela nya Oheh Oluhyeh jeh anginyi eheh gwu apwu ikila wuuh le.

Ela nya Oheh Oluhyeh bwuh “uhyeh-ogba.” Saji nya oowa le, o rih ang o-da ikiletu ile ká imih-enyih bala imih nya abwela onyiila ohoho nwu. Uka ká onginyi á ye iryah da, ko pe hih ihobiri wuuh la ohoho, ko wurwu Ongolahi la Jisos Krayist wepeu nyamwu, ko ka no epwa too e-epwu okiletu nyamwu lala Ongochida, Ongolahi la ka me ilomwu je Ongoowa yeeyee. Oowa le, o kaa chi ijih nya okekeni bala okpunyih olala ha okiletu nya ongo omimi lele. Ingiile ho e-epwu nya ohihi nyam nya ogbanye ogbanye la eka 1937. Bwuh uka oowa gbeeh daale le, m̄ biri o-jih lawule nyam bala Ongolahi la olebi-ebi oowa enenehe leka. M juwa bileng ká ka hwuh ilong wuuh lepwu lepwu jwuh Ongolahi la Jisos Krayist u-ubwo, ya ilong chepetekee hoo, ó rih ká ho inyi leka aale.

— Watson Goodman (1920-2002)

OHÁHA NYA OHEH OLUHYEH

Ala-Rom 5:8

Ma, Oheh Oluhyeh ayidang ti chi oháha olala otuka nyamwu ole ko la e-ega nyahi wuuw eheh le. Saji uka ole kahi juwa jijih e-epwu nya ihobiri oho nyahi wee le, Oheh Oluhyeh duh Krayist erwu wari kaka gbuu wonu nyahi jwuh.

Jon 13:1

Uka oowa, o hih lala uturwu oopokpoh ká enu uturwu nya Ang Oririh Ochipwurwu nya ala-Juuu ka pwu ejih le. Uka owe, Jisos ayidang ti jé yekee, uka nya awa ole koowa nyi ka kpa rwu bwuh epwu nya odeheh ole, tiri ekpe ka ega nya Oheh Oluhyeh Adidowa nyi juwa jwuh chwee lume le. Angile ki rih anginyi nyamwu e-epwu nya odeheh ole le, i hoo lume. O la oháha oowa e-ega nyaa gbeeh jwuh ka obaba.

Owurwu Wurwu 1:5

Ká onahi bala okpunyih nya Jisos Krayist ongole ko rih ibeenuh ochila o-hwuh okiletu ha nya Oheh Oluhyeh bala o-rih Onyi nya ogbanye ogbanye i-ilahi nya Oheh Oluhyeh ha angi gbugbuh ile wuuw ki wulejih bwuh la igwuh juwa hihi mími, bala o-rih adirahwu ogbahi nya alidirihwu ilodeheh ole wuuw a juwa tanu inyinyi me. Ahi ayidang há Jisos Krayist oowa lume. Inyi a duh ko kpa iwo nyamwu hwúuhi wuuw cherih cherih bwuh epwu nya ihobiri iho nyahi wuuw le.

Jon 3:16

Saji, alodeheh ole há Oheh Oluhyeh lume gbeeh ko duh Onyewe olookpokpoh nyamwu wari kaka gbuu wonu nyaa jwuh, saji ká ong mí ong ole ko mi loo le, á ka ta ayirejih kaka. Ma, ko ka la ohihi omími-ka.

Jeremaya 31:3

Ongolahi me ilomwu jem ugbeeneh. O bimh yekee, A hám lume okporih kporih gbeh oyih mí oyih le. Saji nya oowa le, ubwo onahi nyam, m kpa gbileng ba ilom le.

JISOS KRAYIST RIH OHEH OLUHYEH

I Timoti 3:16

Umume okpibaa na erwu onyiila nya onginyi nya Oheh Oluhyeh oririh, ole kahi mi la jaabwo ká Oheh Oluhyeh bwuh choo eheh mejeehi, á jwuuh iwee odada kpongħ kpongħ ka. Olegbejwuh nya erwu onyiila oowa jwuuh abwuma nya onginyi eheh luka ko chi ilomwu eheh. Olegwuh Igogo chi okwurwu kwurwu nyamwu eheh mejeehi ahi anginyi eheh. Alegwuh erwu nya Oheh Oluhyeh kpa ehi nya ilaa ye ebi-ebi nyamwu. Anginyi nyamwu kpa erwu onyiila nyamwu kaka yah pye ka epwojah mí epwojah wuuh. Alepwojah la dati dati mi la enyi nyamwu odeheh ole. Oheh Oluhyeh kpoo rwu ka epwooheh lahi lahi.

Jon 14: 9, 10a

Jisos we bih o yekee, Filip, o rih ole kam hwee tanu, ang amale kaka le, o rih á mila jé ongole kam rih leka piyoo daale? Ong mí ong ole ko yem le, aale, ongoowa ye Oheh Oluhyeh Adida le. Eeh le, i-ye a tí duh ká mimi juwa yekee, Me ongole ká Oheh Oluhyeh Adida rih jeehi me, ti ti? Filip, o rih ahwu ayidang á mi yekee, am nyi juwa e-epwu nya Oheh Oluhyeh Adida, Oheh Oluhyeh Adida ayidang nyi titi jam e-epwu nyam am inyinyi ka?

Jon 1:1 bala 14

Bwuh omwu-omwu odada, Ela ole ko juwa hihi le, o juwa eneh-eneh le. Uka oowa, Ela oowa juwa ta Oheh Oluhyeh ayidang. Ela oowa a rih Oheh Oluhyeh le. . . . Ela o-hwuh ohiji nya Oheh Oluhyeh ha anginyi eheh oowa wari kaka rih onginyi eheh luka ole ki moo wari we epwu nya odeheh ole. O kwu ám e-epwu nya odeheh ole tahi. Uka oowa, ahi angile kahi juwa too le, ahi kpa ehi nyahi ye ebi-ebi nya ogboh otuka nyamwu. Ogboh otuka oowa a rih ang o-jwuuh ejee yekee, owa ayidang kpangga nyaa rih Onywewo olookpo-kpoh nya Oheh Oluhyeh Adida lele. Ahi ye jaabwo ká ahyeerwerwa bala ela nya ilehi mi epwu nyamwu pweepwee uka oowa inyinyi.

JISOS, ONYI NYA OHEH OLUHYEH

Ong mí ong ole ko yah da odeheh yekee, Jisos nyaa rih Onyewe nya Oheh Oluhyeh inyilehi le, aale, Oheh Oluhyeh juwa hihi e-epwu nya ongoowa le. Aale, ongoowa ayidang titi juwa hihi e-epwu nya Oheh Oluhyeh inyinyi le.

—I Jon 4:15

Saji, e-epwu nya Krayist ole ki mama wari we odeheh ole lala onginyi eheh, umume olala bala ang mí ang nya ohihi nya Oheh Oluhyeh ayidang wuuuh a jih chi onu jira lele.

—Ala-Kolosi 2:9

I ma onyi hahi, i ti hwuh onyi ga hahi inyinyi. Ongiri o-kpa gbeh anginyi ka jih ubburwubwo nyamwu. I ka wurwu enyi nyamwu Ebi-ebi, Ongo mela je, Oheh Oluhyeh Agwugwu, Adida Ogboiyih mí Oyih, Önyadirahwu nya Okpunyih.

—Ayisaya 9:6

Olegwuh erwu owe we bih oo yekee, Meri, woh me! Olegwuh Igogo nya Oheh Oluhyeh ka wari kaka hwu tang, ongiri nya Oheh Oluhyeh Agwugwu ti ka chi kwurwung inyinyi! Saji nya oowa le, i ka wurwu onyi nyang oowa Onyi Oligogo. I ka wurwoo, Onyi nya Oheh Oluhyeh ayidang inyinyi.

—Luk 1:35

Uka ká Pita juwa kpa ela oowa yah wee le, egbamwu nya ahigbooh otuka tuka ohe a chi kwurwaa iwa wuuuh u-uwa lele. Uka oowa, omih ohe juwa yah ela bwuh epwu nya egbamwu oowa da odeheh yekee, Ongole a rih Onyewe olikeje nyam ole ko hám lume le. Ela mí ela nyamwu wuuuh hám lume kaka kpoyeh. Le anu anginyi eheh, anú-u woh omih nyamwu me.

—Matiyu 17:5

Elewe rih o-ho jira nya ela ole ká Ongolahi Oheh Oluhyeh yah bwuh onu nya olomwu nyamwu onyogoh yekee, Anu woh me, onyi onjwoh iyang ole ko jé oleng enenehe leka, ka jenyi. O ka ma onyi oleng. I ka wurwu enyi nya onyi oowa, Imanuel, ole ká etuh nya Imanuel rih Oheh Oluhyeh jam e-epwariri nyahi.

—Matiyu 1:22, 23

JISOS YAH DA ODEHEH ONGOLE KÁ OWA AYIDANG RIH

Jon 11:25

Jisos we bih oo yekee, Am kpakpakpa a rih owulejih bwuh la igwuh ayidang bala ohihi le! Ong mí ong ko mi lam le, ó ririh ko gbugbuh kpá, o ka mími wulejih bwuh la igwuh, juwa la ohihi okila.

Jon 13:13

Anu ayidang kaa wurwum Ayibahi iticha bala Ongolahi. Ole kanu kaa wurwu inyi le, anu jé yah, saji inyi, m rih inyilehi le.

Jon 8:23

Jisos we bih aa yekee, Anu ayidang rih alejih. Ma, am le, m ti bwuh uhyeh-ogba hirejih. Anu rih alodeheh ole. Ma, am ayidang le, m ti rih alodeheh ole tanu kpongħ kpongħ ka.

Jon 9:5

Saji ole kaam ayidang jam odeheh ole wee le, am kpakpakpa a rih otinikah o-hwuh ahigbooh nya ohihi nya Oveh Oluhyeh ha alodeheh lele.

Jon 6:35

Jisos we bih aa yekee, Am kpakpakpa a rih ikaa nya ohihi oowa lele. Ong mí ong ole ko wari we ega nyam le, aale, imih á ka nwoo kpá enenehe kaka. Ong mí ong ole ko ti kpa okiletu ookpokpoh mi lam le, aale, imih-enyih á ti ka nwoo kpá enenehe kaka inyinyi.

Jon 8:58

Jisos we bih aa yekee, Nya ilehi ilehi, m binuh yekee, eneh ki ka ma Ebrahim le, am ayidang juwa le.

Jon 10:7

Inyi, Jisos a mími bih aa yekee, Am kpakpakpa a rih onu ubgħeyi o-bwuh ka ubeh nya ikpilo nya Oveh Oluhyeh le.

UKWURWO ILEBI-EBI IHYE ILE KÁ JISOS HO

Matiyu 14:19-21

Uka oowa, Jisos bih alirwu nyang anginyi iwe wuuuh yekee, Anu nyi hwuhwu beebee u-uhyeh nya ame iwe me. Oowa le, o hwuh abe nya ikaa irwu iwe bala iyenyih imiiyeh iiwa le, o hwuh ehi nyamwu hwaa riri ka epwooheh le, o jih Oheh Oluhyeh obeh e-epwu nya abwo oriri le, o gwuh ikaa iiwa eneh le, o goh aa ha angijugbeyi nyamwu lele. Inyi, angijugbeyi nyamwu iwe a titi yeh kpa keleh kila alirwu nyang anginyi iwe wuuuh lele. Uka ká alirwu nyang angiiwa wuuuh rih ang oririh oowa wuh epwu le, angijugbeyi nya Jisos a goh apwu nya ikaa bala iyenyih ihiih iiwa mi edoh iwoh kwurwu imiiyeh lele. Irwuuh ojwujwuh nya aleng igbahi ile-pwu nya alirwu nyang anginyi iiwa la anginyi angi uno iwoh kwurwu imiiyeh da anginyi angi ohwuh iwoh chiririh. Ma, i ti wa anyang bala anyi anjwoh ichicheh jwuh laa kpongkpong ka.

Luk 5:5, 6

Sayimon we bih oo yekee, Ayibahi eeh! Ino, ahi ye akama nya ilehi ilehi loduh-oduh gbeeh ká ahi pye le, áhi wuh ingingihye kpongkpong ka. Ma, bwuh la ela oyayah olonu nyang, m ka da ubbowu oowa jaabwo ká yah le! Inyi, uka ki keleh kaka da ubbowu nyaa u-uwa inyilehi le, i wuh irwu nyang iyenyih mi ubbowu nyaa kpong kpong lala o-rih-ekee, ubbowu nyaa iiwa nyaa ka gwuh eneh hih awule lele.

Matiyu 20:30 bala 34

Oowa le, aliduh imiiyeh ihye ile ki hwuhwu u-ugbeyi oowa a woh ojah yekee, Jisos nyi juwa chipwurwu kam le, i juwa yah ela la omih ogbooh yekee, Ayibahi, ahwu onyi nya Devidi, chwuchwuuh yehi ahyeerwerwa chee me! . . . Inyi le, aliduh iwe a la Jisos ahyeerwerwa lume le, o keleh kaka yubwo nyamwu gwuh aa egbahi nyaa lele. Oowa le, i jé juwa yoyi i-ijata ijata le, i juwa ba Jisos je lele.

JISOS KRAYIST RIH ONGO HO ANG WUUH BALA ONGOLAHIA LA

Ala-Kolosi 1:16

Saji, bwuh epwutubwo nya Krayist oowa ayidang, Oheh Oluhyeh a ho ang mí ang wuuuh ile ki juwa e-epwooheh bala ile ki jam odeheh ole wuuuh tu ang mí ang ile ki jé-e yeye e-ehi bala ile ki jé-e yeye e-ehi kaka wuuuh le. Ó rih ká ang iiwa á rih echí adirahwu ririh, leeh, o-rih ayibaba o-jih uhyeh nya angi ikila wuuuh wewe, leeh, o-rih alegbejwuuh inyiingiri wewe, leeh, o-rih alegbejwuuh igbejih nya anginyi eheh, leeh, alegwuuh erwu wewe, aale, ang mí ang iiwa wuuuh ile ká Oheh Oluhyeh hoho le, i bwuh epwutubwo nya Krayist wuuuh. Krayist oowa ayidang kpangga, Oheh Oluhyeh a ti ho ang iwe wuuuh ha inyinyi lele.

Ala-Hiburuh 1:2

Ma, luka o-hih ekpe-ekpe oleeleee le, Oheh Oluhyeh yah ela ta anginyi eheh bwuh onu nya Onyewe nyamwu le. Onyewe oowa kpangga. Oheh Oluhyeh a chwu ko ka rih ongo rih ugwuuh nya ang mí ang ile wuuuh ká Oheh Oluhyeh hoho lele. Bwuh la Onyewe oowa ayidang, Oheh Oluhyeh a ti ho odeheh ole inyinyi le.

Ala-Rom 14:9

Saji, Krayist wari kaka gbuuh bala owulejih bwuh la igwuuh mími juwa hihi, saji ko ka jé-e bwuh la oowa rih Ayibaba nya angi gbugbuh wuuuh, bala angi juwa hihi wuuuh inyinyi!

Jon 1:3

Ang mí ang ole wuuuh ká Oheh Oluhyeh ho bwuh omwu odada le, O haa bwuh la Ela nya ohihi oowa. Upile nya ingingihye á juwa ole ká Oheh Oluhyeh ho e-ekpe nya Ela oowa kpongħ kpongħ ka.

Ukwurwo Nya Alerwu 2:36

Inyi, Pita a mími bih aa yekee, Anu woh me! Anu ala-Isirel wuuuh, anu jé nya ilehi ilehi leelee me. Jisos ongole kanu wuh kpa kaka gwuh ilooth ba okojih le, owa kpa-kpakpa, Oheh Oluhyeh a chwu, hwuh oo nya Ongolahi la bala Krayist nyahi wuuuh lele.

JISOS KRAYIST A RIH AGABA IDUH OLE KO KA LA ANGINYI EHEH WUUH EJEH UKA O-HIH EKPE LE

Ala-Rom 14:10

Eeh le, ahwu ongole ká wee ya ejeh wuh onyadang okila e-epwu nya Krayist le, i-iye a tí duh ká juwa ho inyi? Ahwu ongole ká ti wee ya ehi da onyadang okila e-epwu nya Krayist bweeh le, i-iye a tí ká juwa ho inyi inyinyi? Saji, ahi angi mimi wuuh juwa ka keleh kaka godayi riri i-ilahi nya echí adirahwu olejeh nya Oheh Oluhyeh piih.

Matiyu 25:32

Uka oowa, alepwojah mí epwojah nya odeheh ole wuuuh ka keleh kaka jira i-ilahi nyamwu. Oowa le, owa ayidang a ka chaa ebwoh imiiyeh lala ongo gbeh ikpilo a chí ikpilo nya-mwu ebwoh hih imwu embirih nyamwu lele.

Ala-Rom 2:16

Le, iryah o-la onginyi ejeh olepwu okiletu nya anginyi eheh owe kpangga, a ka rih ibeenuh nya ang mí ang ole ká ong mí ong jam ho ibaa-ibaa odeheh ole u-uwa i-ilahi nya Oheh Oluhyeh la enu uturwu nya ejeh nyamwu ole ko ka la bwuh la Krayist Jisos inyinyi, jaabwo kam kaa yah da odeheh e-epwu nya erwu onyiila o-yah pye nyam ole inyinyi lele.

II Timoti 4:1

Timoti, m jam dang ehileh i-ilahi nya Oheh Oluhyeh bala ilahi nya Krayist Jisos Ongo ka la anginyi ihihi bala angi gbugbuh ejeh luka ole ko ka wari bala ipi adirahwu nya-mwu.

Ukwurwo Nya Alerwu 10:42

Inyi, Jisos oowa ayidang a dahi ehileh yekee, ahi nyi kpa erwu onyiila ole kaka yah pye jeh anginyi eheh wuuuh me. Kaahi nyi mimi juwa rih ibeenuh yah jeh alodeheh wuuuh yekee, Jisos oowa kpakpakpa a rih ongole ká Oheh Oluhyeh chwu, ko ka rih ongo la anginyi ihihi bala angi gbugbuh wuuuh ejeh lele.

JISOS KRAYIST UBWOOMWU A KAA CHI ANGINYI EHEH DA LE

Ala-Hiburuh 7:25

Inyi a duh ká Jisos oowa la ongiri uka wuuuh nya o-ka hwuh ochida ha angile wuuuh ki ka mi-i keleh ka ega nya Oheh Oluhyeh bwuh loo mí jaabwo mí abwo ki jwuh irwuuh kaka ba lele. Saji, jaabwo ká Jisos oowa juwa hihi piyoo lele, o juwa i-ijata nya Oheh Oluhyeh, juwa biloo wonu nyahi ahi angi mimi wuuuh jwuh uka mí uka le.

Ukwurwo Nya Alerwu 4:12

Ochida nya Oheh Oluhyeh á ti juwa hahi ahi anginyi eheh la ubgbeiyi okila ololohe dala o-bwuh la enyi nya Jisos Krayist owe kaka. Saji, enyi okila ololohe á juwa ole ká Oheh Oluhyeh hwuh ha ongongohe e-ekpelejih nya enu ole, kahi ka jé-e bwuh loo, chida mí kpongħ kpongħ kaka. Kene kene, ongiri nya enyi nya Jisos ubwoomwu me inyi!

Jon 10:9

Am kpakpakpa a rih onu ubgbeiyi o-bwuh ka ubeh nya ikpilo nya Oheh Oluhyeh oowa lele. Le, ong mí ong ole ko ka mi-i bwuh ega nyam jwu keleh ka ubeh nya ikpilo oowa le, aale, o ka chida le. Aale, ongoowa ka la ongiri juwa jwu bwuh onang nya ubeh oowa kpeheh bala o-jwu ka epwang, ka juwa tito nya ang orrih jaabwo ko hoo kaka ba mí inyinyi le.

Jon 14:6

Jisos we bih oo yekee, Am kpakpakpa a rih Ugbeyi oowa le. Am kpakpakpa a rih Ela nya Ilehi le. Am kpakpakpa a ti rih Ohihi ayidang inyinyi lele. Ongongohe á juwa ole ko ka jé-e pwu ega nya Oheh Oluhyeh Adida mí kaka. Kene kene, ó rih ká ongoowa á bwuh ega nyam eneh le me inyi.

Jon 8:24

Inyi a duh kaam ayidang binuh yekee, anu ka gbuu e-epwu nya ihobiri ihoho nyanu iwe piih lele. Anu ti ka gbuu la ihobiri iiwa inyilehi, ó rih kaanu ayidang á mi mi yekee, am kpakpakpa nyaa rih, Amkpaa oowa, inyilehi lele ka.

JISOS KRAYIST UBWOOMWU A KAA CHI ANGINYI EHEH DA LE

Ala-Kolosi 1:12-14

Anú-u juwa jih Oheh Oluhyeh Adida olepwooheh obeh uka mí uka saji nya ole ko ho kaahi bala anu angi mi loo wuuh rih angi chila chila, nya o-ka la ebwoh ohe nya ang ugwuuh nya ahi owawa nya Oheh Oluhyeh ole ko nwula no gbeh angi igogo nyamwu wuuh ilepwu nya ahigbooh nya Oheh Oluhyeh me. Oheh Oluhyeh ayidang gbahi kpeheh bwuh epwu nya o-rih onyohi nya ongiri nya ukpowuh le, Oheh Oluhyeh á kpahi keleh kaka jwuh ka epwu nya ohihi nya ipi adirahwu nya Onyewe nyamwu ole ko hoo lume lele. Onyewe nya Oheh Oluhyeh oowa ayidang a rih ongole ko kpa iwo nyamwu ra ihih nya ochida nya Oheh Oluhyeh hahi, duh ká Oheh Oluhyeh hinyo hih ihobiri ihoho nyahi wuuh hahi le.

Luk 19:10

Saji am Onyi nya onginyi eheh ole wari we odeheh ole kaka pilahi nya angile ki hwahi hih ubgbeysi nya Oheh Oluhyeh kam ka chaa da bwuh epwu nya ihobiri ihoho nyaa wuuh inyinyi.

I Ala-Korinti 1:30

Oheh Oluhyeh oowa kpangga a rih egbejwuh nya emwu-enyih nya ohihi ole kanu la bwuh la Krayist Jisos le! Saji Krayist oowa kpangga. Oheh Oluhyeh a ho ko ka rih emwu-enyih nya ela ojéje nyahi lele. Owa a ti rih emwu-enyih nya abwela onyiila nyahi, bala inya ocherih cherih olala i-ilahi nya Oheh Oluhyeh, bala ochida olala nyahi inyinyi lele.

Tayitos 2:14

Krayist oowa a hwuh ohihi nyamwu kila iyah wonu nyahi jwuh, saji ko ka gbahi kpeheh bwuh epwu nya ang inyibih ihoho nyahi wuuh, bala o-hwú ohihi nyahi cherih cherih saji kahi ka jé-e rih anginyi nyamwu ubwoomwu kemh, bala o-ka rih angi juwa kpa ongiri nyahi wuuh ho ukwurwo onyiila kemh inyinyi lele.

IWO NYA JISOS A NWU URIH NYA IHOBIRI LE

Leelee, jabwo ká Oheh Oluhyeh ya ejeh owuwuh u-uhyah
nya ohobiri ohoho rwuhi ahi angí mimi i-ilahi nyamwu bwuh
la iwo nya Krayist ole ko ya ye hwurwu saji nyahi we lele, o
titi la gbadaa inyinyi yekee, ahi ka beh hih agbama nya
Oheh Oluhyeh ole ko juwa ka wurwuh jahi da angihobiri
piih i-ilahi inyinyi le.

—Ala-Rom 5:9

Ala-Efesos 1:7

Bwuh la Krayist oowa, ahi la ochida nya Oheh Oluhyeh,
ole ká Krayist kpa iwo nya ilomwu ra iih nyamwu wonu
nyahi jwuh lele. Inyi a duh ká Oheh Oluhyeh hinyo hih
ihobiri nyahi wuuh hahi bwuh la udu nya onahi ochakwu
chakwu otuka nya Oheh Oluhyeh e-eega nyahi wuuh le.

I Pita 1:18, 19

Anu la ilonu jé yekee, Oheh Oluhyeh ranu rara ha ilomwu,
bwuh la ole ko gbanu kpeheh bwuh epwu nya agbayi nya
ang inyibih ihoho ile kanu yeh bwuh epwutubwo nya adanu
anyi le. U-uma nya ang ile ki kaa biri biri mí ilodeheh ole lala
okpokoh onyoowurwuh, leeh, okpokoh igom, Oheh Oluhyeh
a ti kpa ranu ha ilomwu ka. Ma, iwo olinya otuka nya
Krayist ole ko lala Onyi okpilo ole ko la abi okpukpu nya
ang onyobih ololohe ka, leeh, o-da ukpurwuh kpongong
kpongong ka inyi!

Ala-Hiburuh 9:14

Anyanyi, anu tí meh iryah ká irih olala nya iwo nya
Krayist oowa ayidang ti ti ka la ongiri kaka ba e-epwu nya
o-ka hwú iryah o-la onginyi ejeh olepwu nyahi kpengh
kpengh bwuh epwu nya ukwurwo inyibih nya ihobiri i-jwuh
apyobwunah-ka ihoho nyahi wuuh, saji kahi ka jé-e juwa
hihi e-epwu nya erwu omimi ha Oheh Oluhyeh mí kaka ba?
Ang oduduh ká iwo nya Krayist rih ang olirih lume olinya
rih-ekee, owa ayidang hwuh ilomwu kaka kila iyah
okpeekpee ha Oheh Oluhyeh bwuh la ongiri nya Olegwuh
Igogo ongo juwa hihi gbeh oyih mí oyih, inyi a duh le!

OCHIDA JIH BWUH LA O-MI LA KRAYIST

Ala-Efesos 2:8, 9

Onahi ogahi ododuh nya Oheh Oluhyeh, Oheh Oluhyeh a kpa chinu da luka ole kanu mi la ela nyamwu le. Oowa á ti bwuh la ingingihye ole kanu ho lubwo nya ilonu kpongħ kpongħ ka. Saji, ogahi onahi nya Oheh Oluhyeh kemh, o rih le. Ochida nyanu oowa, á rih urih oyeyeh nya ukwurwo ohoho nyanu ka, le, ongongohe á ka jé-e kpa chi ogwuh kpongħ kpongħ ka.

Ala-Rom 5:1

Saji nya oowa le, jaabwo ká Oheh Oluhyeh ya ejeh owuwuh nya ohobiri ohoho nyahi rwuhi bwuh la omimi olala lele, ahi la okpunyih e-ega nya Oheh Oluhyeh leelee bwuh la Ongolahi Jisos Krayist le.

I Jon 5:4

Saji, ong mí ong ole ko rih onyi nya Oheh Oluhyeh nya il-ehi ilehi le, aale, o ka la ongiri o-kpa kwurwu ang onyobih nya odeheh ole mí le. Ang ole kahi kaa kpa kwurwu odeheh inyi mí rih omimi olala nyahi e-ega nya Ohehe Oluhyeh.

Jon 20:31

Ma, ukwurwo ebi-ebi ile ki da kpeheh e-epwu nya upwu ole le, i daa kpeheh, saji kaahwu ongo wa upwu ole ka jé-e mi yekee, Jisos kpakpakpa nyaa rih Krayist Onyewe nya Oheh Oluhyeh oowa inyilehi lele. Saji ká omimi olala nyang oowa ka ho ká ka la ohihi omími-ka bwuh la enyi nya Jisos.

Jon 6:28-29

Inyi, angiiwa a too ito yekee, Ayibahi iticha, i-iye a tí chila kahi ka ho piih ko ka meje ukwurwo nya Oheh Oluhyeh ohoho me? Jisos we bih aa yekee, Ukwurwo nya Oheh Oluhyeh ohoho a lee lele: Anu kpa okiletu nyanu wuuh mi la Onyewe nya Oheh Oluhyeh ole ká Oheh Oluhyeh duh wari we odeheh ole me.

AHYEERWERWA NYA OHEH OLUHYEH

Ejeh Onyiila 103:11

Jaabwo ká epwooheh jih lurwu piipiih hih ipi wee, inyinyi, ahyeerwerwa nya Oheh Oluhyeh a lume e-ega nya angile ki jwuh uhuh nyamwu le.

Ejeh Onyiila 103:17

Ahyeerwerwa nya Ongolahi la, domwu bwuh orogoh orogoh, mími juwa gbeh oyih mí oyih e-ega nya angile ki jwuh uhuh nyamwu. O-la kpakpa nyamwu ti juwa e-ega nya ugbiyegwuh nyaa gbeh oyih mí oyih.

Mayika 7:18

O-owoh a tí rih Oheh Oluhyeh dala Ahwu, ko ka jé-e pe hih ihobiri ohoho bala o-ye abwela i-pipi nya anginyi nyamwu ba ejih inyi? Ó ka kpa eje owuwu tahi nyamwu o-okiletu gbeh oyih mí oyih ka, saji ahyeerwerwa oyeye hoo lume.

Eje Onyiila 108:4

Ahyeerwerwa oyeye nyang lume gwu o-bwuh odeheh ka epwooheh. Ela ilehi nyang ti la uhyeh kaka wuh egbamwu oyi inyinyi.

Idah Ojejeh 3:22, 23

Oheh oluhueh á tahi ayirejih ka, saji nya ole kahi loo ahyeerwerwa. Ahyeerwerwa nyamwu á ti kaa bah ka. Ene-neenu, o kaa rih onyeeweh onyeeweh. Ela ilehi nyang lume!

Tayitos 3:5

O chihi da bwuh epwu nyaa wuuh lele. Ma, ochida oowa á rih inyah, saji nya ingingihye ole kahi kpa abwela onyiila nya ilohi ho eneh kpongħ kpongħ ka. Ma, ahyeerwerwa nya Oheh Oluhyeh kemh, o kpa chihi da le. Ahi la ochida oowa luka ole ká Olegwuh Igogo nya Oheh Oluhyeh hwúhi cherih cherih bwuh la o-ya o-nwu ma onyeeweh bala ohihi onyeeweh nya Oheh Oluhyeh hahi.

OHEH OLUHYEH JUWA BEH EKO WURWUUHI KA EGA NYA ILOMWU

Matiyu 11:28

Uka oowa, Jisos yekee, Anu kewe we ega nyam, anu angile wuuh kanu wee kpa ilonu da rruh la ukwurwo nya olah nya okilekuh okpakpa bala ayijih obwobwo, m ka ya omwiinyo ha ugboduh okpukpurwuh nyanu.

Owurwu Wurwu 22:17

Uka oowa, Olegwuh Igogo nya Oheh Oluhyeh bala ahwu nya Onyi okpilo nya Oheh Oluhyeh yah da odeheh yekee, Eeh, kewe me! Ong mí ong ole wuuh ko woh ela oowa, a titi yah inyinyi yekee, Eeh, kewe me! Ong mí ong ole wuuh ká imih-enyih á juwa nwoo bala ong mí ong ole wuuh ko hóo le, aale, ongoowa a kewe we ega nya Onyewe nya Oheh Oluhyeh nya o-ka yah enyih nya ohihi nwa la o-ka nwu urih nyamwu nwu eneh kaka me.

Jon 7:37

Inyi, enu uturwu o-hih ekpe-ekpe nya ojira jira nya ang oririh oowa ole ko baba gwu enu uturwu ikila wuuh a wari lele. Inyi, Jisos a wulejih godayi koko enu uturwu oowa le, o juwa yah ela gbooh da odeheh yekee, Anu anginyi wuuh, anu woh me! Ong mí ong ole ká imih-enyih á juwa nwoo le, aale, ongoowa a wari we ega nyam kaka yeh enyih nya ohihi nwa me.

Ayisaya 55:1

Anu woh me! Ongole ká imih-enyih á nwu le, aale, a kewe we ega ká enyih jih me. Ongole ko ti la okpokoh kpongħ kpongħ ka, a kewe kaka ra ang ko rih. Eeh, kewe kaka ra ang onwanwa bala enyih eme labwabwo. Inya á juwa ka.

Ayisaya 1:18

Ongolahi la yekee, Anu kewe kahi ya egbejwuh keh awule kahi meh obih me. Ó rih ká ihobiri nyang á la monyooh la abilaala, i ka ye la owurwuh lala ara, í ti la omila lala egbu wewe, i ka yeda lala owuh onyoowurwuh.

A-ANGINYI WUUH A RIH ANYI NYA OHEH OLUHYEH KA

Ala-Rom 8:14, 15

Saji, angile wuuh ki mi juwa ba iryah nya Olegwuh nya Oheh Oluhyeh olepwu nyaa je e-epwu nya ohihi nyaa wuuh kemh, a rih anyi nya Oheh Oluhyeh ile ki rih angigbahi e-epwu nya ela nyamwu wee le. Saji, Olegwuh nya Oheh Oluhyeh ole ko ya hanu le, ó rih Olegwuh o-kpanu jwuh ka epwu nya onyohi oririh ole kanu ka tiri ekpe mími ka epwu nya uhuh ojwujwuh kaka. Ma, Olegwuh oowa ole kanu yeh, rih Olegwuh ole ko kaa hwuh iweh ahwurwu nya anyi igbahi oririh i-ilahi nya Oheh Oluhyeh ha angi mimi. Inyi a duh kaahi angi ilinyi wuuh kaa la ongiri, juwa wurwu Oheh Oluhyeh yekee, Adada, Oheh Oluhyeh Adida nyam mí bwuh la ongiri nya Olegwuh Igogo oowa lele.

Ala-Filipai 2:15

Saji kanu ka jé-e rih angi la abi ololohe ka, bala o-rih angi ho ingingihye onyobih kpongħ kpongħ kaka, lala anyi ikpeekpee nya Oheh Oluhyeh ile ki da ukpurwuh onyobih ololohe kaka e-epwu nya odeheh onyobih okwurwa kwurwa a-abwela ole ká anginyi ilepwu nyamwu rih anginyi inyibih, i-pi ela nya ilehi anyokoh me. Saji ká abwela onyiila ohoho nyanu ka juwa wurwuh lala ahigbooh ha alodeheh iiwa me.

II Ala-Korinti 6:17, 18

Saji nya oowa le, anu gba kpeheh bwuh epwu nya angi jém Am Oheh Oluhyeh jé-ka, kanu chi ebwoh dati ham me. Inyi, Ongolahi a yah le. Anu yubwo nyanu gwuh ingingihye ole ko chiri i-ilahi nyam Am Oheh Oluhyeh ka. Ó rih kanu mi ho inyi le, aale, M titi ka yenuh baje ha ilom lele. Oowa le, Am Oheh Oluhyeh a ka rih Adanu lele. Oowa le, anu titi ka rih anyi aleng bala anyi anyang nyam inyinyi lele. Inyi, Ongolahi Agwugwu otuka a yah le.

Ma, ong mí ong ole wuuh ko ka kpa okiletu ookpokpoh yeh Ela nya ohihi oowa bala o-mi la enyi nyamwu yeeyee le, aale, o ka ya ongiri ha angiiwa wuuh ki ka ye rih anyi ilam ilam nya Oheh Oluhyeh le.

—Jon 1:12

ALA ILE KÁ OHEH OLUHYEH YAH U-UHYEH NYA EREH ONYOONGIRI

Ala-Galetiya 5:19-21

Ang ile ká imih nya ugbinyiro kaa kpa onginyi eheh kaka ho la gedeh gedeh. Iwa a lee le: Uya ohoho, owurwuh olala ka a-abwela, ohihi nya uhilah olala e-epwu nya ang onyobih ohoho, ihyeh ijigah okpukpu wuuh, uhwa ojwujwuh wuuh, ujih mí ujih ojwujwuh wuuh, ela omwomwo wuuh, ijijih onyobih olala wuuh, agbama ojwujwuh wuuh, ang nya ilong ilong o-háng há kemh, onginyi ongo okila omimi-ka wuuh, olegwuh nya ebwoh ochichi olala wuuh, imaje nya ang nya onginyi okila olala wuuh, ereh onwanwa juwa ya, ojira jira nya uya oyaya onyobih juwa rih ang oririh okombah wuuh, bala uma nya ang inyibih ikila ihobo iliiwe wuuh. Jaabwo kam danu ona u-uhye nyang ang iliiwe eneh-eneh le, m mími jam danu ona leelee yekee, ong mí ong ole ko juwa ho ang itipyo i-lala iliiwe wuuh á ka jé-e rih ugwu nyipu ipi adirahwu nya Oheh Oluhyeh kpongħ kpongħ kaka.

Ayisaya 5:11

Iyooh otuka otuka a juwa ha angile ki chahi luturwu gbegbegbeh domwu nya ereh onwanwa gbeeh ká oduh ka hih, la ereh juwa yaa inyinyi!

Anu cherih kahi juwa ho abwela onyiila okpeekpee opwokwu lala angile ki juwa e-epwu nya ahigbooh nya ahi opyepye nya ohihi nya Oheh Oluhyeh me. Le, anu tutum mi kahi juwa la ojira jira nya uya oyaya onyobih ole ki kaa juwa rih ang oririh okombah u-uwa kaka, leeh, o-ka juwa nwa ereh ya kaka. Leeh, o-juwa la ohihi nya uhilah nya uya ohoho ka, leeh, o-juwa la uhilah nya ang inyibih ikila ohoho kaka inyinyi. Leeh, o-juwa mwo ela ta angi ikila ka, leeh, o-juwa la ijijih onyobih kaka inyinyi. Ma, okoko nya oowa le, anú-u tutu juwa da abwela onyiila ohoho nya Ongolahi Jisos Krayist kwurwu ilonu wurwumh kemh me. Anu mi kanu ya ega da ha imih nya ugbinyiro nyanu, juwa ho ang ole ká imih nya inyiro oowa ka binuh yah, nyi ho me, kpongħ kpongħ kaka.

—Ala-Rom 13:13, 14

ELA O-HO KPAKPA KEMH, Á NWA LEKA

Matiyu 22:37, 38

Jisos we bih o yekee, Ongolahi Oheh Oluhyeh nyang ka háng nya ilehi ilehi bwuh epwu nya okiletu nyang wuuh, bwuh epwu nya ugboduh okpukpurwuh nyang wuuh, bala o-bwuh epwu nya iryah omemeh nyang wuuh inyinyi. Ehileh owe kpangga a rih ehileh o-kwu-ilahi wuuh bala ehileh ole ko baba kpá gwu ehileh nya Oheh Oluhyeh ikila wuuh lele.

Mak 10:17-22

Uka ká Jisos juwa rwu bwuh ega oowa, oleng ohe keleh kaka ya arwuu nyamwu kwu ejih i-ilahi nya Jisos bih oo yekee, Ayibahi iticha onyiila, i-iye, m tí ka ho piih, eneh kam ka la ohihi omími-ka? Jisos we bih oo yekee, I-iye a tí duh ká juwa wurwum Ongolahi onyiila eneh? Ongongohe á rih onginyi onyiila kpongħ kpongħ ka. Kene kene, Oheh Oluhyeh ubwoomwu me inyi! Jisos mimi bih oo yekee, A tí jé ehileh nya Oheh Oluhyeh ile ki da u-Upwu Igogo eneh-eneh le. Iwa lee le: A nwu onginyi ka. A da ela-ahwu, leeh, o-ho uya ka. A yoyih ka. A rih ibeenuh onookila ka. A ho onginyi rih ka. Jwuh ihih nya adang bala inang. Oowa le, onyi oleng owe, a we bih Jisos yekee, Ayibahi iticha, ingiiwe wuuh rih ingiile kaam ayidang kaa ho eneh-eneh bwuh enjwoh enjwoh nyam le! Inyi, Jisos a kpa ehi nya oháha mwuurwu ye oleng owe ching le, o bih oo yekee, Oligwuh nyam, ingihye ookpokpoh hih hang wee! Keleh ka epwa, ká goh ang mí ang nyang wuuh ra, ká ya okpokpoh nyamwu ga ha alikpehikah me. Aale, a ka la udu olepwooheh le. Ká kewe kaka bam je me. Oowa le, oleng owe a pi ahi kpanya kpanya juwa yegirih rwu la ayijih otuka otuka o-oluhyeh nya elewe ká Jisos bih oo lele. Saji owa ayidang kpu udu lume kaka kpoyeh.

Etuh 16:25

Ugbeyi ohe jih ole koo meh onginyi eheh lala ugbeyi onyiila. Ma, o-obaba nyamwu, agbeyi nya igwuh a jih le.

A MI KI PIRING KA

Anu mi ká ongongohe a juwa kpa ela o-jwuuh apyobwunah-ka ololohe hwunu ahi kooh! Saji u-uhye nyang i-hih dee-jih ilinyi wuuuh a duh ká agbama otuka nya Oheh Oluhyeh juwa ka wurwuh jahi da angile wuuuh ki rih angi kaa jwuuh ihih nya Oheh Oluhyeh kpongħ kpongħ ka piih lele.

—Ala-Efesos 5:6

Leeh, ánú tí jé yekee, angi ho abwela onyobih wuuuh nyaa rih angile kii nyí ka jé-e jih epwu nya ogwuh nya angi ka rih ugwuuh nya ipi adirahwu nya Oheh Oluhyeh kpongħ kpongħ ka le ka? Anu mi ki piriinu jwuuh kooh! Angile ki rih angi juwa ho uya wuuuh, leeh, angi juwa kpú ijigah wuuuh, leeh, angi juwa da ela-ahwu wuuuh, leeh, aleng ile ki kaa juwa ho uya ta aleng aanaa wuuuh, leeh, angi rih aleyih wuuuh, leeh, angi rih alimaje wuuuh, leeh, angi rih angi nwa erah juwa ya wuuuh, leeh, angi rih angi juwa doh anginyi idoh wuuuh, leeh, angi rih alagburwu wuuuh le, aale, í ka jé-e rih ugwuuh nya ipi adirahwu nya Oheh Oluhyeh mí kpongħ kpongħ kaka!

—I Ala-Korinti 6:9, 10

Anu cherih kanu rih angi woh erwu onyiila nya Oheh Oluhyeh wowoh kemh ka. Ma, okoko nya oowa le, anu rih angi juwa ho ela oowa ho me. Saji, ó rih inyi ka, tubwo aale, anu juwa pri ilonu jwuuh ododuh titi wee. —Jemsi 1:22

Anu anyi anjwoh nyam, anu mi ká ongongohe a piriinu jwuuh kooh! Ong mí ong ole ko juwa ho abwela onyiila, aale, ongoowa a rih olabwela onyiila jaabwo ká Krayist ayidang rih olabwela onyiila le. Ong mí ong ole ko juwa hihi ka ilahi ilahi e-epwu nya ohobiri ohoho wee, aale, onyi nya oheh onyobih ayidang, ongoowa a rih le. Saji ohobiri ohoho a rih ukwurwo nya oheh onyobih bwuh omwu odada le.

—I Jon 3:7, 8a

Anu woh me! Ongongohe ole ko juwa kpa ilomwu ka uhyeh gwu iweh ahwurwu nya ilomwu, uka ole ko ti rih ing-ingihye ka, aale, ongoowa juwa piri ilomwu jwuuh ododuh wee.

—Ala-Galetiya 6:3

OHOBIRI KPA IGWUH WEJIH

Ala-Rom 5:12

Ohobiri jwu wari we epwu nya odeheh ole bwuh la oleng ookpokpoh. Oowa le, ohobiri nyamwu oowa a kpa igwuh ogbugbuh jwu wari inyinyi lele. Inyi a duh, ká igwuh ogbugbuh oowa chi kila anginyi eheh wuuh lee lele. Saji anginyi eheh wuuh rih angihobiri.

Jemsi 1:15

Uka ká enyi ojeje nya ehyang nya ang onyobih ohooho oowa a wuh epwu le, ongoowa a kaa ya ma ohobiri ohooho lele. Uka ká ohobiri ohooho oowa á ti juwa nwa ka ilahi ilahi gbeeh, ko pwu achinegeh le, o-yah da odeheh nyamwu a kaa rih igwuh ogbugbuh lele.

Ala-Rom 8:6

Iryah nya ang nya imih nya ugbinyiro ilinyi kemh omemeh kaa kpa igwuh ogbugbuh kila onginyi eheh! Ma, apyobwunah nya o-ba iryah nya Olegwuh Igogo je kemh, ti rih ohihi onyeeweh bala okpunyih olala.

Izikel 18:20

Ugboduh okpukpurwuh onyi mí onyi ko hobiri, o ka gbuuh. Onyi nya ongongohe á ka yel oluh nya ohobiri nya adamwu chwu ka, leeh, adida o-yeh oluh nya ohobiri nya onyi nya-mwu kpa ka inyinyi. Abwela onyiila nya olabwela onyiila ka jih uhyeh nya ongoowa. Ohobiri nya ongohobiri ka jih uhyeh nya ongohobiri oowa inyinyi.

Luk 15:32

Le, a wu eje ka, O rih ang ochila chila kahi ka chi okekeni u-uhyah nya onyanya nya onyinang ole. Saji o-lala inyaa gbugbuh eneh-eneh. Ma, leelee le, o ti jam hihi le. Ino, o bibih eneh-eneh, ma, leelee le, ahi ti yoo le.

Etuh 11:19

Jaabwo ká abwela onyiila kaa kpa ohihi we onginyi, inyinyi, o ka la le. Ongole ko rwunye ba ang onyobih, juwa rwunye ba igwuh nya ilomwu inyinyi.

JISOS KRAYIST KWURWU IGWUH

Uka oowa, Jisos keleh kaka yubwo gwuh akpa nya ogwuh oowa. Inyi le, angile ki juwa kpa akpa oowa a godayi riri ching lele. Oowa le, Jisos a yah ela, bih ogwuh oowa yekee, Okolobyah, m bingh yekee, wulejih leelee me. Oowa le, ogwuh okolobyah oowa a chahi bwuh la igwuh, wulejih leelee me. Oowa le, ogwuh okolobyah oowa a chahi bwuh la igwuh, wulejih hwuhwu jé juwa yah ela ahyaahi ahyaahi lele.

—Luk 7:14, 15a

Uka ká Jisos yah inyi kpá le, o beh eko wurwu Lazaros la omih o-gbooh yekee, Lazaros! Gba kpeheh wari leelee me! Inyi, ogwuh i-Lazaros oowa a wulejih bwuh la igwuh gba kpeheh lipwu lipwu ile ki ya roo a-abwo bala ata nyamwu wuuh bala ipwu ile ki ya chi aba wuh oo a-ahi nyamwu wuuh inyinyi lele. Oowa le, Jisos a bih angile ki juwa u-uwa yekee, Anu keleh kaka yih ipwu iwe hih oo kanu tu hih oo ko rwu me. Oowa le, i ho inyi lele.

—Jon 11:43, 44

Ang oduduh kam há Oheh Oluhyeh Adida lume rih saji nya ole kaam ayidang mi hwuh ohihi nyam deejih ga ha igwuh. Saji kam ka mími-i hwuh ohihi nyam oowa tiri ekpe bwuh ejih. Ongongohe okila á juwa yeh ohihi nyam oowa bwuh ega nyam ka. Ma, am ayidang a wee tu ubwo hih oo deejih la ilom le. Saji, m la ongiri nya o-ka tu ubwo hih ohihi nyam deejih la iryah nya ilom mí bala o-ka hwuh oo bwuh ejih mí inyinyi. Saji, inyi, Oheh Oluhyeh Adam, a dam ehileh yekee, am nyi ho le.

—Jon 10:17, 18

Am kpakpakpa a rih ongoowa ole kam juwa la ohihi eneh-eneh, kam gbu le. Ma, ti ye me. M wulejih bwuh la igwuh, m mími jam hihi piyoo gbeh oyih mí oyih le. Amen. Am kpakpakpa a rih ongo kpa elele nya igbogolo nya onu ugbeysi nya igwuh o-nwu onginyi nwu bala inya onu ugbeysi nya ejegwuh ayidang kpangga lele.

—Owurwu Wurwu 1:18

EHILEH IWOH NYA OHEH OLUHYEH

Dutironomi 5:7-21

A la ihyeh ijigah kpongah kpongah bam ka.

A ho ekpekwuh, leeh, ang ole ko ka meh ingingihye e-epwoohed, u-uhyeh, leeh, ingingihye o-meh ang ile ki jih odeheh, e-ekpelejih, leeh, ingingihye o-meh ang ilepwu enyih odeheh e-ekpelejih, ile ká ka chwu memh ka. A kwu arwuu ejih haa, leeh, o-gbigba haa ka.

A hwuh enyi nya Ongolanu la Oheh Oluhyeh nyang hwukeeh ka. Saji, Ongolahi la á ka ya ejeh rwu ongole ko hwuh enyi nyamwu hwukeeh u-uhyeh nya oowa ka.

Áa kpa enuturwu omwiinyo nya Ongolanu la Oheh Oluhyeh nyang, ká chi igogo jwuh oo, jaabwo ká Ó dang ehileh. E-epwu nya enuturwu irwonye, a ka ho ukwurwo nyang wuuh le.

Áa jwuh ihih nya adang bala inang jaabwo ká Oheh Oluhyeh Ongolahi la dang ehileh me.

A nwu onginyi eheh ka.

A da ela-ahwu bala o-ho uya ka inyinyi.

A yoyih ka inyinyi.

A rih ibeenuh onookila ba onginyi eheh oonang ka. Leeh, o-tito nya ahwu nya oonang ka, leeh, o-yehi riri epwa nya oonang ka, leeh, erwu nyamwu, bala anche aleng bala anche anyang ilepwa nyamwu, leeh, iyoh ilepwa nyamwu, leeh, ingingihye ile ki rih inya oonang ka.

Á KA KPIBAA HIH OHEH OLUHYEH MÍ KA

Job 34:21, 22

Ahi nya Oheh Oluhyeh ye agbeyi nya abwela nya anyi nya anginyi eheh wuuuh. Saji nya oowa le, o jé ingiile ki ho wuuuh. Ukpowuh ololohe á jih, leeh, ang o-keh igwuh ole ká angihobiri ka jé-e kpibaa ka.

Ejej Onyiila 139:8, 12

Ó rih kám kpuhyeh ka epwoohéh, a juwa. Ó rih kam ya ang o-da nuneh nyam da o-obwilah, u-uwa, a jijih wee le. Eeh le, ká ukpowuh a kpu onginyi ibaa hingh Ahwu Oheh Oluhyeh mí ka. Ma, i-ilahi nyang, ahigbooh o-la aloduh mememeh bala inya enu ochichi. Ugbowuh bala ahigbooh wuuuh la ookpokpoh i-ilahi nyang Ahwu Oheh Oluhyeh.

Jeremaya 23:34

Ongolahi la yekee, Iweh ibaa ohi jih ká onginyi ká kpibaa u-uwa kam ka jé-e yoo ka enenehe le? Am ayidang, M mi epwoohéh bala odeheh wuuuh ka? Inyi, Ongolahi la a yah le.

Etuh 15:3

Ahi nya Ongolahi la jih ega mí ega wuuuh, kaa ye ang inyibih bala inyiila ile ká anginyi eheh wuuuh kaa ho.

Luk 8:17

Saji ingingihye á juwa ole ká onginyi eheh á tu kpu ibaa kpire kpire eneh le, ko ka jé-e chi eheh a-ahigbooh kaka le ka. Leeh, ang mí ang ole ká onginyi eheh á ho kwih kwih enen le, ko ka jé-e chi eheh a-ahigbooh kpu, anginyi eheh ka jé-e jóo gedeh gedeh inyinyi kaka le ka.

AKAMA O-GBEH OYIH MÍ OYIH NYA ANGI JÉ BALA O-MI LA OHEH OLUHYEH KA

Matiyu 13:41, 42

Uka oowa, am Onyi nya onginyi eheh ole ka duh alegwuh erwu nyam erwu kaka kwuh angile wuuuh ki kaa hobiri bala angile wuuuh ki kaa ho ká anginyi eheh aanaa kaa wuh orih nya ohobiri ohoho kpeheh hih ipi adirahwu nyam. Oowa le, i ka goh ang inyibih iiwa wuuuh jwuh ka epwu nya ilah nya utiyoh otuka olobwilah ega ole ki ka juwa jeh idah bala o-ka juwa ka wangiri piyoo lele.

Matiyu 18:8

Saji nya oowa le, ó rih ubwo nyang, leeh, eta nyang, ko wee ka kpang kaka wuh orih le, aale, áa choo daarwu hih ilong me. Saji, o ka hiigwuh hang gwu, nya o-ka rih olekwata, leeh, olekwubwo ká ka jwu ka epwu nya ohihi omími-ka, gwu o-ka rih ongo la abwo imiimiiyeh, leeh, ata imiimiiyeh ki ti ka hwungh jwuh ka epwu nya ilah o-gbeh oyih mí oyih piyoo.

II Pita 3:7

Ela olonu nya Oheh Oluhyeh olinyinyi, Oheh Oluhyeh a mimi yah neejih rwú uhyeh-ogba nya epwooheh bala odeheh olelee duh ká Oheh Oluhyeh wee jwuh aa ito gbeh ilah o-ka rwaa rwu piih lele. Saji, Oheh Oluhyeh tu ubwo hih uhyeh-ogba nya epwooheh bala odeheh ole no gbeh enu uturwu ole ko ka ya ejeh nyamwu wuh angihobiri bala o-ka taa ayirejih gbang gbang.

Ejeh Onyiila 9:17

Angihobiri bala upwoma nya anginyi ile ki deyirih nya Oheh Oluhyeh wuuuh, i kaa hwuh aa jwuh ka obwilah.

Matiyu 25:46

Uka oowa, i ka kwuh angi inyibih iwe wuuuh rwu keleh ka epwu nya akama o-gbeh oyih mí oyih. Ma, alabwela onyiila wuuuh ti ka jwu ka epwu nya ohihi omími-ka.

EJEH OLALA OLIJWUJWUH

Ukwurwo Nya Alerwu 17:31

Saji, Oheh Oluhyeh hwuh uturwu ookpokpoh ohe no i-ilahi ole ko ka kpa abwela onyiila nyamwu la anginyi eheh ilodeheh ole wuu ejeh pih le. Oheh Oluhyeh chwu Jisos Onyewe nyamwu koowa a ka rih ongo ka kpa onu la anginyi eheh ejeh la enu uturwu oowa le. Inyi, Oheh Oluhyeh a wuleh Jisos oowa ejih bwuh la igwuh nya ang o-jwuh ejee ha alodeheh yekee, Oheh Oluhyeh nyaa chwu Jisos inyilehi lele.

II Pita 2:9

Ole mejeehi jaabwo ká Oheh Oluhyeh ayidang kaa bwuh gba angile ki rih anginyi nya Oheh Oluhyeh kpeheh bwuh epwu nya omaye nyaa wuuuh. Ole ka mími mejeehi jaabwo ká Oheh Oluhyeh ayidang jé kaa bwuh ya alabwela inyibih akama inyinyiinyi kinoo gbeeh pwu enu ututwu nya ejeh o-hih ekpe nyamwu.

Ala-Hiburuh 9:27

Saji, Oheh Oluhyeh hwuh uka ookpokpoh kemh no ha onginyi eheh onyi mí onyi ko ka gbuh. Uka ko gbuh kpá, o ka keleh kaka godayi riri i-ilahi nya ejeh nya Oheh Oluhyeh piih.

II ala-Korintti 5:10

Saji, ong mí ong lepwu nyahi wuuh juwa ka keleh kaka godayi riri i-ilahi nya echi nya ejeh olala nya Krayist pih, luka ole ko ka lahi ejeh. U-uwa, ongongoonwu a ka jé-e yeh urih onyiila, leeh, urih otipyo kwuh iwah nya ang mí ang onyiila, leeh, otipyo ole kahi jam kpa ubginyiro nyahi ho la ohihi nyahi olodeheh ole lele.

Ala-Rom 14:12

Saji nya oowa le, ong mí ong lepwariri nyahi á ka dayih la o-ka keleh kaka yah ilomwu da odeheh i-ilahi nya Oveh Oluhyeh piih kaka.

OGAHI ONAHI NYA JISOS KRAYIST

Ma, Adam bala ongoowa, á la ookpokpoh ka. Saji, Adam kpa igwuh ogbugbuwari. Ma, ohihi, ongoowa a ti kpa wari bwuh la ogahi onahi nya Oheh Oluhyeh le. Le, jaabwo ká igwuh ogbugbuwari chi kila anginyi eheh wuuw bwuh la ohobiri ohoho nya Adam le, o titi la gbadaa yekee, ohaha nya ohihi olala bwuh la ahyeerwerwa nya Oheh Oluhyeh, titi ka juwa ha irwuh nya anginyi eheh mwu aba ba bwuh la onahi nya Krayist oowa inyinyi piih le. —Ala-Rom 5:15

Saji nya oowa le, ochwuchwu nya Oheh Oluhyeh á doh pile i-iryah nya onginyi eheh ayidang, leeh, o-bwuh la jaabwo ká ongoowa juwa nwu ilomwu la ukwurwo ohoho lume ka. Ma, ochwuchwu oowa doh pile ayeerwerwa nya Oheh Oluhyeh ubwoomwu kemh. —Ala-Rom 9:16

Saji, Oheh Oluhyeh kaa tu alobooche pipi. Ma, Oheh Oluhyeh ti kaa ho angi dumwo onahi lume. —I Pita 5:5b

Uka oowa, alerwu onyiila nya Krayist juwa ka ongiri otuka otuka nya Oheh Oluhyeh rih ibeenuh e-epwu nya ela nya Oheh Oluhyeh oyayah pye nyaa, saji nya owulejih bwuh la igwuh nya Ongolahi Jisos. Oowa le, ahi owawa otuka otuka nya Oheh Oluhyeh a juwa u-uhyah nyaa iwa wuuw lele. —Ukwurwo Nya Alerwu 4:33

Saji, m jé yekee, anu jé ang saji nya onahi nya Ongolahi Jisos Krayist ayidang. Jaabwo koowa ayidang, ino, rih ongo kpu udu otuka otuka e-epwooheh eneh ko ti tu ubwo hih ilomwu kaka rih olokpehikah, saji kanu ka bwuh la ebyahi nyamwu oowa rih angi kpu udu e-epwu nya ela nya Oheh Oluhyeh. —II Ala-Korinti 8:9

Obeh ojijih a juwa ha Oheh Oluhyeh Ongole ko kaa hwuh ohaha otuka ole ká onu nya onginyi eheh á ka jé yah da odeheh mí kaka, ga ha anginyi nyamwu.

—II Ala-Korinti 9:15

ABWELA OYEDA

Luk 13:3

Eheh! Inyi, o la ka. Nya ilehi, m binuh yekee, ó rih kaanu ayidang á ye iryah da bwuh epwu nya ihobiri ihoho nyanu ka, aale, anu wuuh ka ta ayirejih inyinyi wee!

Ukwurwo Nya Alerwu 3:19

Le, anu ye iryah da leelee bwuh epwu nya ihobiri ihoho nyanu, kanu nya tiri ekpe chi Oheh Oluhyeh ogwu, ká Oheh Oluhyeh a yile ibih nya ihobiri ihoho nyanu iiwa wuuh hiinuh me. Saji kanu ka jé-e la ilah ochichi o-bwuh ijata nya Ongolahi Oheh Oluhyeh e-epwu nya ohihi onyeeweh nyanu oowa inyinyi me.

Ukwurwo Nya Alerwu 2:38

Inyi, Pita a mími bih aa yekee, Anu ye iryah da bwuh epwu nya ihobiri ohoho nyanu wuuh, ká ong mí ong lepwu nyanu a keleh kaka hwu enyih Oheh la enyi nya Jisos Krayist nya ang o-jwuh ejee yekeeé, Oheh Oluhyeh hinyo hih ihobiri nyanu wuuh hanu le me. Oowa le, anu titi ka yeh ohaha nya Olegwuh Igogo ole inyinyi lele.

Matiyu 3:2

Egbejwuuh nya ela nya Oheh Oluhyeh ole ká Jon juwa yah jeh aa rih-ekee, Anu ye iryah da bwuh epwu nya ihobiri ihoho nyanu wuuh me. Saji uka nya ipi adirahwu nya epwooheh jwuh chwee lume le.

II Ala-Korinti 7:10

Saji, ó rih ká uhuh nya Oheh Oluhyeh ojwujwuuh olepwu okiletu nya onginyi eheh á kpa ongoowa kaka la ojwujwu nya okiletu u-uhyyeh nya ohobiri ohoho nyamwu, ká ongoowa á ye iryah da bwuh epwu nya ohobiri nyamwu oowa le, o linyi a kaa kpa ongoowa kaka wuh ochida nva Oheh Oluhveh oyi le, ongoowa a kaa chi ijemah la ubgveyi ololohe kpongħ kpongħ kaka lele. Ma, jaabwo ká ojwujwuuh olepwu okiletu u-uhyyeh nya ohobiri ohoho nya alodeheh ile ki jé Oheh Oluhyeh ka, á rih inya iryah oyeda ka le, inyaa iwa kaa kpa igwuh ogbugbuuh kemh kilaa!

OHINYO HIH NYA IHOBIRI NYA ANGINYI EHEH

Jisos mimi yekee, Saji ó rih kanu juwa hinyo hih ihobiri nya angile ki hobiri baanu haa, aale, Oheh Oluhveh Adanu titi ka hinyo hih ihobiri nyanu anu hanu inyinyi le.

—Matiyu 6:14

Ma, ó rih ká ongole ko hobiri-i ka jih ekpe da ihobiri nya-mwu ile ko ho, ko ka juwa kpa ona odada nyam wuuuh, ko ti juwa ho ingiile ká ehileh yah, nyi ho, bala o-ho ala inyiila inyinyi, aale, ongoowa ka juwa hihi gbeh oyih mí oyih. Igwuh á ka nwoo kaka inyinyi.

—Izikel 18:21

Anu ya me! M godayi riri lee o-onu nya ugbeyi o-bwuh we epwu okiletu nya ong mí ong wuuuh le! Ong mí ong ole wuuuh ko woh omih nyam, ko rih ká ongoowa á mi wurwu ugbeyi nya okiletu nyamwu da dodox ham, aale, m ka jwu keleh ka epwu nyamwu kaka rih ang oririh ta ongoowa. Aale, ongoowa ti titi ka jwu epwediih nya ang oririh ta ongoowa. Aale, ongoowa ti titi ka jwu epwediih nya ang oririh tam inyinyi le.

—Owurwu Wurwu 3:20

Ongole ko ho ohobiri a pe hih ugbeyi nyamwu oowa dee-jih. Ongole ko rih olabwela onyobih a ye iryah ilepwu nya okiletu nyamwu da inyinyi, ko rwu nya tiri ekpe we ega nya Ongolahi la me. Aale, o ka ye ongoowa ahyeerwerwa. Ongoowa a tiri ekpe ka ega nya Oheh Oluhyeh me. Saji, owa ayidang chogba nya ohinyo hih ha anginyi eheh.

—Ayisaya 55:7

Oheh Oluhyeh ti hwuh Jisos oowa keleh ka iweh ahwurwu oluhyeh kaka hwuhwu u-ubwuririh nya ilomwu inyinyi le. Oheh Oluhyeh kpa Jisos oowa keleh ka iweh ahwurwu nya olegbejwuh oririh bala Ongochida, ole ko ka kpa ala-Isirel kaka jé ang ole ká iryah oyeda rih bala o-ka ho ki ka jé-e yeh ohinyo hih nya ihobiri ihoho nya wuuuh bwuh ega nya Oheh Oluhyeh mí le.

—Ukwurwo Nya Alerwu 5:31

OCHEBWOH HIH ANG NYA ODEHEH OLE

Tayitos 2:11, 12

Saji Oheh Oluhyeh chi onahi nyamwu eheh ha anginyi eheh, saji ki ka bwuh loo, la ochida nyamwu le. Onahi nya Oheh Oluhyeh oowa a kaa mejeehi jaabwo kahi ka bwuh tu ubwo hih ubgbeysi nya onginyi nya Oheh Oluhyeh oririh-ka wuuuh, bejih bala imih nya inyiro olodeheh ole wuuuh inyinyi le. Oowa le, ahi kaa jé-e kpa ela ojéje ho abwela e-epwu nya ang mí ang nyahi wuuuh, bala ohihi nya abwela onyiila ohooho, bala inya onginyi nya Oheh Oluhyeh oririh kpeekpee e-epwu nya odeheh ole mí lele.

Ala-Kolosi 3:2

U-uhyeh nya ang abwo ile ki juwa e-epwooheh kemh, anu ka juwa meh imahi nyaa le. Anu meh imahi u-uhyeh nya ang abwo ilodeheh ole kpongah kpongah kaka.

Ala-Efesos 5:11

Anu mi kanu kpa ubwo nyanu kaka jwuh ukwurwo nya ukpowuh nya ohobiri ohooho kaka, saji, í jwuh apyobwunah ololohe ka. Ma, okoko nya oowa le, anú-u juwa chi ihobiri il-nyi eheh a-ahigbooh me.

Ayisaya 1:16

Anu keleh kaka hyoh enyih kanu hwú ilonu cherih cherih me. Anu tu ibih nya ang inyibih nyanu ihoho kinyaa himh a-ahi, kanu bah la ang inyibih ihoho me.

I Jon 2:15, 16

Anu mi ká odeheh ole a háanu lume ka, leeh, ang mí ang il-epwu nyamwu kpongah kpongah ka. Saji, ongole ká odeheh ole á juwa há lume le, aale, oháha olala nya ilehi ilehi e-ega nya Oheh Oluhyeh Adida á juwa e-epwu nya ongoowa kpongah kpongah kaka. Saji, uma nya ang ile ki jam e-epwu nya odeheh rih ang ile ká imih nya inyiro nya onginyi eheh kaa mama, bala ang ile ká ehi nya onginyi eheh kaa mama, bala ang ile ki kaa hwuh obooche nya ohihi ha onginyi eheh. Ololohe lepwu nya ang iwe wuuuh á bwuh ega nya Oheh Oluhyeh Adida kpongah kpongah ka. Ma, iwa wuuuh rih inya odeheh ole kemh.

OMAMA ONYEEWEH

Izikel 36:26

M ka ya okiletu onyeeweh hanu bala o-hwuh ugboduh okpukpurwuh onyeeweh jwunuh e-epwu inyinyi. Okiletu onyoongiri lala ejwo ole ko jih epwu nyanu-u wee, M ka gboo hiinuh, oowa le, M ka ya okiletu omile mile lala ugbo jwunuh e-epwu lele.

I Jon 2:29

Jaabwo ká Krayist ayidang rih olabwela onyiila le, anu jé me, ong mí ong ole ko rih ongo ho abwela onyiila ubwoo-mwu a rih onyi nya Oheh Oluhyeh nya ilehi le.

II Ala-Korinti 5:17

Saji nya oowa le, rih ká onginyi eheh á mi la Krayist le, aale, ongo onyeeweh, ongoowa a rih lele. Saji, abwela onyogoh nya ohobiri ohoho nyamwu wuuu chipwurwu hih oo le. Abwela onyeeweh nya ohihi nya Krayist ubwoomwu kemh, ongoowa a la ugbenyi lele.

I Jon 5:18

Ahi jé yekee, ong mí ong ole ká Oheh Oluhyeh á nwu ma onyeeweh le, ó kaa hobiri mími ka ilahi ilahi kaka. Saji Onyewe nya Oheh Oluhyeh ayidang kaa keh ongoowa le. Oheh onyobih á kaa yubwo nyamwu gwuh ongoowa mí kpongħ kpongħ kaka.

Jon 3:3

Jisos we bih oo yekee, Nya ilehi ilehi, m bingh yekee, ó rih ki nwu onginyi ma onyeeweh kpá eneh ka, aale, ongoowa á ka jé-e ye ipi adirahwu nya Oheh Oluhyeh e-ehi mí kaka.

I Pita 1:23

Saji leelee le, i nwunu ma onyeeweh le. Ma, omama onyeeweh nyanu oowa á ti bwuh la uma nya eje nya ang ole ko kaa mama jwuh ejih mí kpongħ kpongħ ti ka. Ma, o bwuh la uma nya eje nya ang ole ko kaa mama mí kpongħ kpongħ kaka. Saji, o bwuh la ela olohihi bala ela o-gbeh oyih mí oyih nya Oheh Oluhyeh ayidang kpangga.

IGWUH OGBUGBUH E-EGA NYA OHOBIRI; OWULEJIH BWUH LA IGWUH BWUH LA KRAYIST

Ala-Efesos 2:1 bala 6

Ino, anu rih angi gbugbuh e-epwu nya olegwuh nyanu bwuh la ihih nya ela nya Oheh Oluhyeh ojwujwuh-ka nyanu, bala ihobiri ihoho nyanu eneh ká Oheh Oluhyeh ya ohihi onyeeweh hanu. . . . Inyi, Oheh Oluhyeh a kpahi ka epwu nya ohihi onyeeweh nya owulejih bwuh la igwuh ta Krayist le. Oowa le, Oheh Oluhyeh a kpahi kaka hwuhwu i-iweh ah-wurwu oluhyeh nya Krayist too e-epwu nya onginyi nya Oheh Oluhyeh oririh lele.

Ala-Kolosi 3:1

Jaabwo ká Oheh Oluhyeh wuleenuh ejih bwu la igwuh ta Krayist lele, anú-u juwa kpa iryah nyanu wuuuh tito nya ang ile ki juwa e-epwooheh kemh, e-ega ole ká Krayist ayidang hwuhwu lale u-ubwuririh nya Oheh Oluhyeh me.

I Pita 2:24

Krayist ayidang a rih ongole ko yeh akama nya ihobiri nyahi ahi anginyi eheh kpa u-uhyyeh nya ugbinyiro nyamwu bwuh la igwuh ole ko gbuuh u-uhyyeh nya okojih le. O ho inyi saji kaahi anginyi nya Oheh Oluhyeh ka jé-e gbugbuh e-ega ká ohobiri ohoho jih, kahi ka juwa hihi e-epwu nya abwela onyiila ohoho nya Oheh Oluhyeh kemh. Abe nya enyirih ile ki nyih Jisos a rih ang ole ko kaa kpa honu anu angi mimi udah nya edurwu lele.

Ala-Rom 6:2 bala 11

Saji, ahi angile kahi gbugbuh wuuuh e-ega ká ohobiri ohoho jih kpá eneh-eneh le, anyanyi, ahi tí ka mimi jé-e juwa hihi e-epwu nya ohobiri ohoho mimi wee? . . . Inyinyi inyinyi, anu ayidang a titi la lele! Anu gbugbuh e-ega ká ohobiri ohoho jih le. Ma, anu ti jam hihi leelee ha Oheh Oluhyeh bwuh la ongiri nya Krayist Jisos le.

OHIGHI OMÍMI-KA

Ala-Galetiya 6:8

Saji, ong mí ong ole ko juwa to ugbeh nya abwela ohoho ha ugbinyiro nyamwu bwuh la o-juwa dire imih nya ugbinyiro nya ilomwu kemh, aale, ongoowa titi ka bwuh la ugbinyiro nyamwu oowa hya igwuh ogbugbuh ta ayirejih piyoo. Ma, ong mí ong ole koowa á ti juwa to ugbeh nya abwela ohoho ha Olegwuh Igogo bwuh la o-juwa dire iryah nya Olegwuh Igogo kemh, aale, ongoowa titi ka bwuh la Olegwuh Igogo oowa la ohihi omími-ka piyoo inyinyi piih.

Jon 17:3

Ole a rih ohihi omími-ka oowa lele, anginyi eheh, o-ka jé yeeyee yekee, Ahwu kpakpakpa nyaa rih Oheh Oluhyeh nya ilehi ilehi oowa lele, bala o-ka jé Jisos Krayist ongole ká duh erwu wari we odeheh ole yeeyee inyinyi.

Jon 3:36

Ong mí ong ole ko mi la Onyewe nya Oheh Oluhyeh oowa le, aale, o la ohihi omími-ka le. Ma, ong mí ong ko ti mi mi la Onyewe nya Oheh Oluhyeh oowa kaka le, aale, ó ka ye ohihi omími-ka oowa e-ehi kaka. Ma, agbama nya Oheh Oluhyeh ubwoomwu kene kene a ka juwa too piyoo lele.

Ala-Rom 6:23

Saji, urih nya ohobiri ohoho rih igwuh ogbugbuh. Ma, ogahi onahi nya Oheh Oluhyeh rih ohihi omími-ka bwuh la Krayist Jisos Ongolahi.

Jon 5:24

Nya ilehi ilehi, m binuh yekee, ong mí ong ole ko woh ela nyam, ko mi la ongole ko dumh erwu wari la okiletu ookpokpoh le, aale, ongoowa la ohihi omími-ka e-epwu nyamwu le. Aale, ongoowa ayidang á ka jwuh ka epwu nya ejeh owuwuh nya Oheh Oluhyeh kaka. Ma, o gba kpeheh bwuh epwu onu nya igwuh, jwu ka epwu nya ohihi o-piyoo le.

ANG O-KPA JÉ OCHIDA

Ukwurwo nya abwela onyiila o-yah da odeheh ka rih okpunyih. O-yah da odeheh meje anginyi nya abwela onyiila ka rih o-la kembee bala o-jé yeeyee yekee, owa nyi la ochida le, gbeh oyih mí oyih.

—Ayisaya 32:17

Anu anyi ichicheh nyam, anu mi ká oháha olala nyahi a rih oháha olugbonu kemh, leeh, inya ela oyaya ka. Okoko nya oowa le, kahi me oháha olala nyahi je bwuh la abwela onyiila bala ela nya ilehi ohoho kemh me. Bwuh la oháha olala oliiwe, ahi kpa jé yekee, ahi juwa hihi e-epwu nya ela nya ilehi ohoho le. Oháha olala oowa a mími kaa hwuh o-jé mími ha okiletu nyahi jahi da Oheh Oluhyeh mí inyinyi le, ko ririh ká okiletu nyahi á juwa maga nya o-ya ejeh wuhih wuwuh la ubgbe yi okila, aale.

—I Jon 3:18, 19

Ang o-jwuh ejee nya o-rih-ekee, ahi ye rih onu-onyi nya Oheh Oluhyeh inyilehi a rih Olegwuh Igogo nya Onyewe ole ká Oheh Oluhyeh ya duh wari we epwu okiletu nyahi le. Olegwuh oowa a kaa kpahi wurwu Oheh Oluhyeh yekee, Adada Oheh Oluhyeh Adida nyam le. —Ala-Galetiya 4:6

Ong mí ong ole ko woh ehileh nyam, ko juwa kpa ho ukwurwo le aale, ongoowa, m há nya ilehi ilehi le. Ong mí ong ole kam ti há nya ilehi ilehi le, aale, ongoowa ka há Oheh Oluhyeh Adam inyinyi le! Aale, am ayidang ti ka la oháha e-ega nya ongoowa nya ilehi ilehi inyinyi, bala o-ka juwa chi ilom egeh meje ongoowa inyinyi le.

—Jon 14:21

Saji, Olegwuh nya Oheh Oluhyeh ayidang a kaa rih ibeenuh nya olegwuh olepwu nyahi ahi angi mími yekee, ahi nyi rih anyi nya Oheh Oluhyeh inyilehi le! —Ala-Rom 8:16

Ang ole kahi kpa jé yekee, ahi juwa hihi e-epwu nya Oheh Oluhyeh bala Oheh Oluhyeh ayidang o-titi juwa hihi e-epwu nyahi rih, Olegwuh Igogo nyamwu ole ko ya hahi.

—I Jon 4:13

JISOS KRAYIST OLE KO KWU EPWA E-EPWU NYAHI KAA YA OKEKENI HAHİ

Jon 17:13

Leelee le, m juwa ka nya tiri ekpe ching Ahwu Oheh Oluhyeh ogwu le! Ma, m ti jam yah ala ile wuuh leelee jeh aa luka ole kam jam odeheh ole taa wee. Saji ká okekeni nyam ka jé-e mi epwu nya okiletu nyaa pweepwee bwuh la oowa.

Ala-Rom 14:17

Saji, a-ang oririh olam olam owe, leeh, ang onwanwa ka epwu ole, a rih ang o-jwuh ejee nya ipi adirahwu nya Oheh Oluhyeh ka. Ma, abwela onyiila nya Oheh Oluhyeh ohoho bala okpunyih olala bala okekeni o-juwa chichi e-epwu nya Olegwuh Igogo, a rih ejee na ipi adirahwu nya Oheh Oluhyeh oowa le!

Ala-Galetiya 2:20

Saji i gwumh ilooth ba okojih ta Jisos Krayist eneh-eneh le. Le, ám ayidang a lee hihi leelee kaka, ma Krayist ongo kwu epwu nyam me inyi. Saji, ohihi nyam ole kam lee hihi odeheh ole le, m jam loo bwuh la ehi o-da hileh Krayist Onyewe nya Oheh Oluhyeh, Ongole kam, há lume gbeeh ko hwuh ilomwu kpa kila iyah saji nyam.

Ayisaya 12:3

Saji nya oowa le, la okekeni, anu ka chí enyih bwuh epwu nya iwelu nya ochida le.

Jon 15:11

M jam yah ala ile wuuh jenuh leelee, saji ká okekeni ochichi otuka nyam ka jé-e hih juwa e-epwu nyanu piyoo, saji ká okekeni olepwu nyanu ka jé-e minu pweepwee.

Ejeh Onyiila 16:11

Ahwu Oheh Oluhyeh a ka me ubgbei nya ohihi jém le, saji i-ilahi nyang Ahwu ayidang, okekeni omími-ka olam olam a jih le. U-ubwuririh nyang, ang ikpipyo ilam ilam a ti jih inyinyi gbeh oyih mí oyih le.

ELA NYA OHEH OLUHYEH OWOWOH JUWA KPA HO UKWURWO BABA LUME

Ala-Rom 6:16

Leeh, ánú tí jé ela ole leka? Ong mí ong ole kaahwu ayidang á juwa jwuh ihih nya ang mí ang ole ko bingh yah, ahwu nyi ho me le, aale, onyohi nya ongoowa, a rih lele. Inyinyi, o ka la hanu lele. Ó rih ihih nya ohobiri ohoho ole ko kaa kpa igwuh obugbuh kila onginyi eheh, kanu juwa jwuh le, aale, onyohi nya ohobiri ohoho, anu rih lele. Leeh, ó ti rih ihih nya Oheh Oluhyeh ojwujwuh ole ko kaa kpa abwela onyiila nya Oheh Oluhyeh kila onginyi eheh kanu juwa jwuh le, aale, onyohi nya abwela onyiila, anu rih inyinyi lele.

II Tesalonayika 1:7-9

Oowa le, Oheh Oluhyeh la ilomwu a ka hwuh omwiinyo nyamwu hanu anu angile wuuuh kanu wee ye akama bala ahi ayidang luka ole ká Ongolahi Jisos ka hih eheh bwuh ep-wooheh hirejih wari la ongiri otuka nyamwu bala alegwuh erwu inyiringiri nyamwu, e-epwu nya owurwuh wurwuh nya elele ilah lele. Oowa le, o ka hwuh akama ha angile wuuuh ki jé Oheh oluhyeh ka, tu angile wuuuh ki mi jwuh ihih nya erwu onyiila nya Ongolahi Jisos Krayist ole kaka, kwuh iwah nya oowa inyinyi lele. Akama oyeye nya angiiwa wuuuh ka rih ayirejih otata o-gbeh oyih mí oyih bala ebwoh ochichi hih ijata nya Ongolahi ayidang bala ebi-ebi nya ongiri otuka nyamwu inyinyi.

Dutironomi 11:26-28a

Anu woh me. Ale ole, M hwuh ahi owawa bala olo o-ga jwuh no hanu. O ka rih ahi owawa, ó rih kanu kpa ehileh nya Ongolahi Oheh Oluhyeh nyanu, ile kam wee danu ale. O ti ka rih olo o-ga jwunuh ó rih kanu ka mi-i kpa ehileh nya Ongolahi la Oheh Oluhyeh nyanu ka.

O-YAH KRAYIST DA ODEHEH BABA LUME

Ala-Filipayi 2:11

Oheh Oluhyeh mími hwuh ni yekee, elele nya ong mí ong wuuh nyi ka juwa yah Jisos Krayist oowa da odeheh lala Ayibaba O-loo la piih, saji nya o-ka ya ogboh ha Oheh Oluhyeh Adida inyinyi le.

Matiyu 10:32, 33

Jisos mími bih aa yekee, Ong mí ong ole ko ka juwa yamh da odeheh lala Ongochida nyamwu, aale, am ayidang titi ka yah ongoowa da odeheh i-ilahi nya Oheh Oluhyeh Adam olepwooheh lala ongo bam je inyinyi. Ma, ong mí ong ole ko ti ka pwam am Krayist rwarwu yekee, owa nyi rih onginyi nyam kpongħ kpongħ ka, aale, am ayidang titi ka pwa ongoowa rwarwu i-ilahi nya Adam olepwooheh inyinyi.

Ala-Rom 10:9, 10

Saji, ó rih ká ka mi-i kpa onu nyang yah Jisos Ongolahi da odeheh lala Ongolang la, ká ka mi kpa okiletu nyang wuuh mi yekee, Oheh Oluhyeh nyi wuleh Krayist oowa ejih bwuh la igwuh inyilehi le, aale, a ka la ochida nya ugboduh okpukpurwuh nyang le. Saji, omimi olala e-epwu nya okiletu nyahi a duh ká Oheh Oluhyeh kaa kpa wa angi mimi ilinyi nya alabwela onyiila i-ilahi nya ilomwu le. Onu nyahi, o ti kpa yah Krayist oowa da odeheh lala Ongochida nyahi, a ti kaa kpahi kaka yeh ochida nyamwu oowa inyinyi lele.

Luk 9:26

Saji ong mí ong ole ko ka juwa jwuh oyih nya o-yah ilomwu da odeheh lala ongo jih oyeh nyam bala erwu onyiila nyam ole, aale, am ayidang titi ka jwuh oyih nya o-yah ongoowa da odeheh lala onginyi nyam ka luka ole kaam Onyi nya onginyi eheh ole ka mwu ogile wari we odeheh ole la ogboh otuka nyam bala ogboh otuka nya Oheh Oluhyeh Adida bala inya alegwuh erwu igogo nyamwu inyinyi.

OHEH ONYOBIH A RIH OLUJIH NYAHI OGWUGWU WUUH LE

I Pita 5:8

Anú-u juwa kpehi ching nya ela, kanu juwa kpehi jwuh il-onu yeeyee uka wuuh me. Saji, oheh onyobih olujih nyanu juwa kaa ga tu ang ang da, juwa da urweh nya ong mí ong ole ko ka yeh wuh rih lala ugebe a juwa da urweh nya iyoh.

Matiyu 4:1 bala 10, 11

Inyi, uka ká Olegwuuh nya Oheh Oluhyeh kpa Jisos keleh ka ubgilejih le, oheh onyobih a ma Jisos ye u-uwa lele. Jisos we bih oo yekee, Ahwu oheh onyobih owe, tu keleh himh piih! Upwu Igogo yekee, Ongolahi Oheh Oluhyeh nyang ubwoomwu kemh a rih Ongole ká ka raabwo ha, juwa mi erwu hoo e-epwu nya igba ogbagba ha kemh inyinyi le. Inyi le, oheh onyobih a rwu hih Jisos le, alegwuuh erwu nya Oheh Oluhyeh a keleh ka ega nya Jisos juwa mi erwu hoo u-uwa lele.

Ala-Efesos 6:11

Kanu goh ang abwo nya agidih nya ewu odada nya Oheh Oluhyeh wuuh kwurwu ilonu me. Saji kanu ka jé-e bwuh la oowa godayi riri girih girih, jé juwa tu ijeehi nya oheh onyobih wuuh pipí mí me.

Ukwurwo Nya Alerwu 26:18

M juwa dungh keleh ká ka wurwu egbahi nya angile ki kpu iduh bwuh la ohobiri oho ho nya, saji ká angiiwa ka jé-e ye iryah da bwuh epwu nya ukpowuh nya ang inyibih iiwa iho ho, ki ka jwu ka epwu nya ahigbooh nya abwela onyiila nya Oheh Oluhyeh. Ká ka mími-i gbaa kpeheh bwuh epwutubwo nya ongiri nya oheh onyobih keleh ka epwutubwo onyoongiri nya Oheh Oluhyeh. Saji ká angiiwa ka jé-e yeh ohinyo hih ihobiri nya, ki ka la iweh ahwurwu ta anginyi nya Oheh Oluhyeh ile wuuh ká Oheh Oluhyeh hwáa cherih cherih ha ilomwu bwuh la omimi olala u-uh yeh nyam am Jisos me.

ANGINYI NYA OHEH OLUHYEH KWURWU OHEH ONYOBIH

II Tesalonayika 2:8

Oowa le, ongo onyobih oowa ayidang a ka chi ilomwu eheh gedeh gedeh lele. Inyi le, Ongolahi Jisos a ka kpa ihwu odada o-bwuh onu nya ilomwu nwu ongo onyobih oowa lele. Jisos ka too ayirejih gbang gbang bwuh la ebi-ebi nya ogboh nya ilomwu luka ole ká Ongolahi ayidang ka mwu ogile wari mimi.

Jemsi 4:7, 8a

Saji nya oowa le, anu kpa ilonu wejih ha Oheh Oluhyeh me. Kanu godayi kpakpakpa, juwa tu oheh onyobih pipi me, aale, o oheh onyobih ka rwunye rwu hiinuh le. Ó rih kanu tu ilonu jwuh Oheh Oluhyeh chwee, aale, Oheh Oluhyeh titi ka tu jwunuh chwee inyinyi.

Ala-Rom 8:35 bala 37

Eeh le, ó rih inyi le, o-owoh a tí tutum mími ka jé-e chihi ebwoh hih oháha nya Oheh Oluhyeh ole kahi la e-epwu nya Krayist mí wee? Akama, a ka chihi ebwoh oowa mí le? Leeh, ang ojwujwu tí? Leeh, o-tu pipi tí? Leeh, imih o-nwuhi nwu tí? Leeh, o-jih lohi lohi yeh ang durwuh ka tí? Leeh, ang ojwujwu o-tuuhi bejih kpali kpali tí? Leeh, ema nya ewu tí? O ti linyi kpá oduh inyi! Ahi rih angi kwurwu kwurwu ma kwurwu i-ilahi nya ang iwe wuuh bwuh la ongiri nya Krayist Ongole kahi há lume.

I Jon 3:8

Ong mí ong ole ko juwa hihi ka ilahi ilahi e-epwu nya ohobiri ohoho wee, aale, onyi nya oheh onyobih ayidang, ongoowa a rih le. Saji ohobiri ohoho a rih ukwurwo nya oheh onyobih bwuh omwu odada le. Ang oduduh ká Krayist Onyewe nya Oheh Oluhyeh wari we odeheh ole rih, saji ko ka ta ukwurwo nya oheh onyobih oowa ayirejih gbang gbang.

ONGINYI O-HÁNG HÁ A RIH ANG O-JWUH EJEE NYA ONGINYI NYA OHEH OLUHYEH ORIRIH LE

Ó rih ká ongongohe á juwa yekee, Oheh Oluhyeh hám lume, ká onginyi eheh oonamwu á ti juwa woo eje, aale, olonookila, ongo olinyi a rih le. Saji, ó rih ká onginyi á la oháha e-ega nya onginyi eheh oonamwu ole ko wee ye e-ehi ka, aale, ongoowa á titi ka jé-e la oháha e-ega nya Oheh Oluhyeh Ongole ko jé juwa ye e-ehi kpongħ kpongħ ka le ka.

—I Jon 4:20

Ugbeyi ole ko hiigwuh gwu wuuh rih-ekee, ó ririh kam jé juwa yah ela la ojah nya anginyi eheh bala o-yah ela la ojah nya alegwuh erwu wewe wee, aale, ó rih ká oháho olala nya ilehi ilehi á juwa e-epwu nyam ka, aale, m̄ ti ti jwuh apyo-bwunah nya ingingihye kaka. Saji, ela oyayah nyam oowa lala omonyo o-hih deejih nya ugwoojeh bala atang onmolong nmolong. —I Ala-Korinti 13:1

Ó rih kaanu ayidang á juwa la oháha e-ega nya awule nya ilehi ilehi inyi le, aale, anginyi wuuh a ka jé yekee, anu nyi rih angijugbeyi nyam inylehi lele. —Jon 13:35

Ma, ugbeyi nya Olegwuh Igogo nya Oheh Oluhyeh ti rih, oháha nya ilehi ilehi olala, okekeni ole ko kaa gbuh enyih-ka olala, okpunyih olala o-okiletu, ugboduh ojwujwuh onyudiyo olala e-ega nya angi ikila, onahi olala e-ega ká angi ikila jih, onginyi onyiila oririh, ongo chila o-hwuh okiletu ha oririh, odumwo olala, bala ang o-ho ba o-oyih.

—Ala-Galetiya 5:22, 23a

Ahi ayidang jé yekee, ahi gba kpeheh bwuh epwu nya igwuh kaka jwuh ka epwu nya ohihi le. Ahi jé inyi, saji nya ole kahi jam la oháha u-uhyeh nya anginyi eheh aanahi. Ma, ong mí ong ole ko ti la oháha e-ega nya onginyi eheh oonamwu ka, aale, ugboduh okpukpurwuh nya ongoowa juwa e-epwu onu nya igwuh piyoo wee. —I Jon 3:14

OWULEJIH BWUH LA IGWUH NYA JISOS KRAYIST

Ukwurwo Nya Alerwu 10:39-41

Ahi angile ayidang kpakpakpa a domwu rih alibeenuh nya ukwurwo iiwa ile wuuh ká Jisos juwa ho o-opi nya ala-Juuu bala epwejih nya Jerusalem lele. Inyi le, i wuh Jisos oowa kpa kaka nwu bwuh la o-gwuh oo ilooth ba okojih lele. Ma, Oheh Oluhyeh ti wuleh Jisos oowa ejih bwuh la igwuh lahi lahi la enu uturwu ohata. Oowa le, Oheh Oluhyeh a chi Jisos eheh mejeehi lahi lahi uka ko wulejih bwuh ka igwuh kpá lele. A-anginyi wuuh, Oheh Oluhyeh a chi Jisos eheh ha lahi lahi uka ko wulejih bwuh la igwuh kpá ka. Ma, ahi angile ká Oheh Oluhyeh chwuchwu kahi ka rih alibeenuh nya ela oowa kemh, o chi Jisos eheh meje le. Ahi ayidang, domwu rih ang oririh bala o-nwa ang onwanwa ta Krayist oowa luka ole ko wulejih bwuh la igwuh kpá, jé le.

Ala-Rom 4:25

Saji, Oheh Oluhyeh hwuh Jisos duh wari kaka gbuuh wonu nya ihobiri ihoho nyahi wuuh jwuh bala owuleh Krayist ejih bwuh la igwuh, saji ko ka bwuh la Krayist oowa wahi lala alabwela onyiila i-ilahi nya ilomwu.

Jon 20:26-28

Inyi, uka ká uturwuohanekwuh wari le, angijugbeyi nya Jisos a juwa u-ubeh, tu ubgbeysi kwuh ilaa mími lele. Uka oowa le, Tomas ti juwa ubgbenyi le. Oowa le, Jisos a hwuh gegile, godayi riri e-epwariri nyaa le, o bih aa yekee, Okpunyih a juwa hanu. Inyi, Jisos a bih Tomas yekee, Kewe, ká ya ukwuchwu nyang gwuh ukpurwuh nya ilooth olubwo nyam bala ukpurwuh nya uwangga olaka nyam me. Ká iwee odada nyang owe a mí hingh, ká jé la omimi ale me. Tomas we bih Jisos yekee, Ongolam bala Oheh Oluhyeh nyam.

OWULEJIH BWUH LA IGWUH A RIH OHWU NYA IRYAH OLOGBOH NYAHI GWU WUUH LELE

Jon 5:25 bala 28, 29

Nya ilehi ilehi, m binuh yekee, uka juwa wari, oleelee a domwu rih uka oowa lele! Ká angile wuuh ki gbugbuh kpá wuuh le, ka woh omih nya Onyewe nya Oheh Oluhyeh. Angiiwa ile ki ka woh omih nyamwu oowa ka la ohihi omími-ka. . . . Saji nya oowa le, o lanu ahibwuuh o-oluhyeh nya owe kpongħ kpongħ ka! Uka juwa wari ká angile ki gbugbuh juwa i-worwuh nyaa wuuh ka woh omih nya Onyewe nya Oheh Oluhyeh! Uka oowa, egwuh iiwa wuuh ka gba kpeheh bwuh epwu nya iworwuh nyaa. Angile ki ho abwela onyiila nya Oheh Oluhyeh, ka wulejih bwuh la igwuh kaka la ohihi omími-ka. Angile ki ti ho abwela onyobih, ka wulejih bwuh la igwuh ka jwuh ka epwu nya ejeh owuwuh nya Oheh Oluhyeh piyoo.

Ala-Rom 6:3-5

Leeh, ánú tí jé yekee, ahi angile wuuh kahi la ohihi onyeeweh nya Krayist, duh ki hwuhi enyih Oheh la enyi nya Krayist Jisos wuuh lee le, ahi nyi hwu enyih Oheh oowa nya ang o-jwuh ejee yekee, ahi nyi titi gbuh igwuh nya Krayist ole kii nyi gbuh too inyinyi le, kpongħ kpongħ ka? Bwuh la enyih Oheh ohwuhwu nyahi oowa, o rih ang o-jwuh ejee yekee, jaabwo kahi bá igwuh nya Krayist bá gbuh too le, i titi jwuhih ejih bala Krayist inyinyi le. Olinyi, saji jaabwo ká Krayist wulejih bwuh la igwuh, juwa hihi mimi bwuh la ongiri ebi-ebi nya Oheh Oluhyeh Adida lele, ká oowa ka ho ko ka jé-e chikpee hahi kahi titi ka juwa jediye e-epwu nya ohihi onyeeweh nya Krayist mí. Saji, jaabwo kahi bá igwuh nya Krayist bá gbuh too le, inyinyi inyinyi, ahi titi ka bá ohihi nya owulejhjih bwuh la igwuh nyamwu bá la too inyinyi piih lele.

IGOGO OLALA HA ONGOLAHIA LA

Oheh Oluhyeh gbahi kpeheh bwuh epwutubwo nya alujih nyahi, saji ko ka dahi ubwo kahi ka juwa mi erwu hoo la uhuh ojwujwuh kpongħ kpongħ kaka. Saji kahi ka kpa igogo olala bala abwela onyiila ohoħo mi erwu i-ilahi nyamwu piyoo gbeeh pwu enu uturwu na ohihi nyahi wuuh.

—Luk 1:74, 75

Jaabwo kahi la irwuħ nya onu omimi iliiwe wuuh bwuh ega nya Oheh Oluhyeh lele, anu angi hám há, anu cherih kahi juwa hwú ilohi cherih cherih e-epwu nya abwela oħħo nyahi wuuh, bwuh epwu nya ang mí ang ole ko ka chi ugbinyiro nyahi iri, leeh, o-ħi olegwuh nyahi iri, kahi la igogo kpeekpee bwuh la uhuh nya Oheh Oluhyeh ojwujwuh e-epwu nya ang mí ang wuuh me.

—II Ala-Korinti 7:1

Saji nya oowa, le, onginyi nya Oheh Oluhyeh onyi mí onyi ole ko mi kpa ilomwu cherih cherih i-ilahi nya Oheh Oluhyeh bwuh la ochejjih ba ang inyibih iħoho wuuh le, aale, ongoowa, Oheh Oluhyeh a titi ka chi iogogo jwuh ha ilomwu ko ka kpa ho ukwurwo oliħiħ-iħiħ bala onwula ongoowa no gbeh o-kpa ho ukwurwo onyiila onyi mí onyi ha ilomwu inyinyi lele.

—II Timoti 2:21

Ma, okoko nya oowa le, jaabwo ká Oheh Oluhyeh Ongole ko beh eko wurwuunu kaka rih anginyi nyamwu rih Ongo oligogo le, anú-u titi juwa la igogo e-epwu nya abwela oħħo nyanu wuuh uka wuuh me.

—I Pita 1:15

Anu rih angile ká Oheh Oluhyeh Adida chwuchwu ha ilomwu jaabwo koowa ayidang meħ obih eneh-eneh yah, owa nyi ka ho. Anu mimi rih angile ká Oheh Oluhyeh kpa Olegwuh Igogo nyamwu chinu ebwoħ ha ilomwu, saji kanu ka je iħiħ ojwujwuh nya ilehi ilehi. Saji, ká Jisos Krayist ka je-e bwuh la oowa kpa iwo nyamwu nyih ilo hwunu inyinyiinyi. Ká onahi nya Oheh Oluhyeh bala okpunyih nyamwu a juwa tanu ogwogwu mwu aba ba me.

—I Pita 1:2

IGOGO OLALA HA ONGOLAHIA LA

Ayisaya 35:8

Ugbeyi ucheh otuka otuka ohe ka juwa, owa a rih ugbeyi le. I ka wurwu enyi nyamwu, Ugbeyi Nya Igogo Olala. Ang mí ang ole ko la igogo ka, ko la cherih cherih ka, á ka chwuchwu bwuh ugbeyi oowa kpongħ kpongħ ka. Ugbeyi ucheh oowa ka rih inya angile ká ugbeyi onyiila há. Aluchih ka pi onu nya ela u-uwa ka.

Ala-Hiburu 13:12

Inyinyi, Jisos ayidang a titi hwuh ohihi nyamwu kpa kaka kila iyah u-uhyeh nya okojih u-ugwume epwa nya epwejih ko ka kpa iwo nyamwu oowa hwúuhi cherih cherih bwuh epwu nya ihobiri ihoho nyahi wuuh lele.

I Jon 1:9

Ma, ó rih kahi ti mi yah ihobiri nyahi ile kahi ho wuuh da odeheh jeh Oheh Oluhyeh, aale, Oheh Oluhyeh rih Ongo chila o-hwu okiletu ha, bala o-la kpeekpee le, O ka hinyo hih ihobiri nyahi iiwa wuuh hahi, bala o-ka hwúuhi cherih cherih bwuh epwu nya ang mí ang inyibih ile wuuh kahi ho inyinyi.

Matiyi 3:11

Am le, m jam kpa enyih olam olam hwunu enyih Oheh la enyi nya Oheh Oluhyeh ko ka rih ang o-jwuuh ejee yekee, anu ya iryah da bwuh epwu nya ihobiri ihoho nyanu wuuh le. Ma, ongohe ole koo wee ka wari e-ekpe nyam le, Olegwuh Ig-ogo bala ilah, o ka kpa hwunu enyih Oheh le. Ongooawa rih ongo otuka gwum lume kaka kpoyeh. Le, m domwu chila i-ilahi nyamwu kpu, m ka kpa ugbete nyamwu hoo kpongħ kpongħ ka.

Ala-Efesos 1:4

Saji, Oheh Oluhyeh chwuhi kahi ka rih anginyi nyamwu bwuh la Krayist eneh-eneh ká Oheh Oluhyeh ho odeheh ole. Saji kahi ka jé-e rih angi la igogo bala o-la abi okpukpu ololohe kaka i-ilahi nya Oheh Oluhyeh lele.

ANGILE KÁ OLEGWUH IGOGO MI EPWU NYAA

Luk 11:13

Eeh le, ó rih kaanu anginyi eveh angi itipyo a-abwela iwe, á jé kaa hwuh ang inyiila ga ha anyi nyanu mí le, anyanyi, anu tí meh iryah ká Oheh Oluhyeh Adanu olepwooheh á ka jé-e hwuh Olegwuh Igogo nyamwu ha angile wuuh ki juwa biloo Olegwuh Igogo oowa kaka dachichih me?

Ukwurwo Nya Alerwu 1:8

Ma, anu ka yeh ongiri nya Oheh Oluhyeh uka ká Olegwuh Igogo á chi kwurwuunu kpá. Oowa le, anu ka rih alibeenuh nyam u-uwa e-epwejih nya Jerusalem, bala u-uwa i-ipi nya Judiyah wuuh, bala i-ipi nya ala-Sameriya wuuh lalala jwuh keleh ka obaba nya odeheh ole wuuh lele.

Izikel 36:27

Uka oowa, M ka hwuh Olegwuh Igogo nyam jwunuh e-epwu nyanu, saji kam ka ho kanu ka juwa jediye bala o-ho abwela onyiila e-epwu nya ona odada nyam. Bwuh la oowa le, anu ka kpa ejeh olala nyam bala ejeh ochichi nyam ho ukwurwo.

Ala-Rom 8:9

Ma, jabwo ká Olegwuh Igogo nya Oheh Oluhyeh ti kwu u-uwa e-epwu nyanu lele, anu tutum rih angi ka juwa ba imih nya ugbinyiro nyanu je mími ubgenyi kaka. Ma, iryah nya Olegwuh Igogo olepwu nyanu oowa kemh, anu ka juwa ho lele. Ong mí ong ole ko la Olegwuh nya Krayist e-epwu nyamwu ka, aale, ongoowa á rih inya Krayist kpongħ kpongħ leka.

Ukwurwo Nya Alerwu 4:31

Inyi, uka ki raabwo oowa kpá le, ega oowa ole ki jih a juwa hwú jighi jighi lele. Oowa le, iwa wuuh a mi la ongiri nya Olegwuh Igogo nya ilehi ilehi le, i juwa yah ela nya Oheh Oluhyeh da odeheh mí la ongiri ongiri la uhh ojwujwuh-kaka lele.

ONU OMIMI ILEBI-EBI ITUKA HA ANGINYI NYA OHEH OLUHYEH

Ejeh Onyiila 34:18

Oheh Oluhyeh kaa jwuh angile ká okiletu kaa kpaa enyih oo-la ela nya Oheh Oluhyeh. O kaa chi angile ká ugboduh okpukpurwuh nyaa la kpakpa e-eга nyamwu da.

Ayisaya 66:2

Ongolahi la yekee, Ingiile wuuuh, Am a haa la ubwo nya ilom le, saji nya oowa le, ang ile wuuuh rih inyam. Ma, anu-u woh me. Ongole kam ka ye alee lele. Ongole ko kpa ilomwu wejih bala ongole ká ugboduh okpukpurwuh nyamwu la kpakpa i-ilahi nyam koo jwuh uhuh, hwú kpakpакpa uka ole kam yah ela, ongoowa, M ka ye le.

Owurwu Wurwu 21:4

Oheh Oluhyeh ka yile egbejidah hih egbahи nya anginyi nyamwu iiwa wuuuh. Igwuh ogbuh ololohe á ka jih kaka. Leeh, idah obaba bala idah ojejh ololohe o-ka jijih kaka. Leeh, ang ojwujwu ololohe, o ka jih kaka inyinyi. Saji, ang mí ang inyogoh wuuuh chipwurwu kam ugbenyi le.

Ejeh Onyiila 37:3

Hwuh okiletu nyang wuuuh niro Ongolahi la, ká ho ang inyiila. Oowa a ka kwu opi oowa mí le. Nya ilehi, i ka ya ang oririh hang wuh epwu uka wuuuh.

I Pita 4:12, 13

Anu angi hám há, uka ká omaye otuka á wari kaka da omimi olala nyanu uyah, aale, o lanu ahibwuuh lume ka, lala o-rih-ekee, ang ole ko la ununa nyaa ho we e-eга nyanu ka. Okoko nya oowa le, anú-u juwa chi okekeni yekee, iwa nyi kijih juwa bá akama bá akama bá ye ta Krayist le me. Saji ká okekeni ochichi nyanu ka lume nya ilehi ilehi lenu uturuwuh o-hih ekpe ole ká Oheh Oluhyeh ka chi ongiri ebi-ebi nya Krayist eheh me.

ONU OMIMI HA ANGILE KÁ IMAYE KAA WE CHAA OGWU

Saji, o-bwuh la ole ká Krayist oowa ayidang wari kaka ye akama odeheh ole, bala o-la imaye la dati dati lala ahi anginyi eheh ikila wuuh a duh koowa ayidang jé la ongiri, juwa da angile wuuh ki jih epwu nya omaye olinyinyi ubwo mí lele.

—Ala-Hiburuh 2:18

Ó rih kanu mi ho inyi le, aale, Oheh Oluhyeh Adida nya okpunyih ayidang ka kwurwu oheh onyobih cheechee hanu, duh kanu ka jé-e juwa kpa eta riroo u-uhyeh mí le. Ká onahi nya Ongolahi Jisos Krayist a juwa tanu me.

—Ala-Rom 16:20

Akama nya olabwela onyiila lume. Ma, Ongolahi la kaa gboo kpeheh bwuh epwu nyaa wuuh. —Ejih Onyiila 34:19

Uka ole ká wee ka bwuh epwu nya enyih otuka nya akama oyeye, M ka juwa tang. Uka ole ká wee ka bwuh epwu nya ihwuh, á ka bih enyih u-uwa ka. Uka ole ká ka je bwuh epwu nya ilah, ilah á ka báng, lee, o-rwung ka, leeh, elele ilah oowa owurwu u-uhyeh nyang ka.

—Ayisaya 43:2

Ahi jé yekee, ang mí ang wuuh kaa ho ukwurwo tuchawule nya ohiigwuh ha bwuh la ongiri nya Oheh Oluhyeh e-ega nya angile wuuh ká Oheh Oluhyeh ayidang há, ki rih angile ká Oheh Oluhyeh beh eko wurwu ki ka rih anginyi nya ilomwu, jaabwo ká obih omemeh nyamwu la.

—Ala-Rom 8:28

Anu woh me! Omaye nya ang onyobih ohoho ololohe á ka jé-e we chinu ogwu, ole ko lala inya anginyi nya Oheh Oluhyeh ikila ka le ka. Saji jaabwo ká Oheh Oluhyeh ayidang rih ongo chila o-hwuh okiletu ha lume le, ó ka mi-i ya ega da ha uma nya omaye o-ka kilaanu kila, yah, nyi we chinu ogwu me, kpongħ kpongħ ka. Ma, uka nya omaye olinyi wuuh, Oheh Oluhyeh ka ya ongiri nyamwu bala ugboduh ojwujwuh hanu, bala o-ka me ugbeyi ole kanu ka jé-e bwuh beh hih omaye oowa jeenu inyinyi.

—I Ala-Korinti 10:13

ONU OMIMI HA ANGILE KI KA LA OKWURWU KWURWU

Ong mí ong ole ko ka la okwurwu kwurwu bwuh epwu nya
uyah omama saji nya omimi olala nyamwu le, aale,
ongoowa, m ka ho ko ka rih ojekpa o-wuh ubeh igogo otuka
nya Oheh Oluhyeh nyam kpa lele. Saji ká ongoowa á tutum
ka jé-e gba kpeheh hih ubeh igogo otuka oowa kpongħ
kpongħ kaka. U-uhyeh nya ongoowa, m ti ka da enyi nya
Oheh Oluhyeh nyam ba, bala o-da enyi nya epwejih nya
Oheh Oluhyeh nyam ole ko rih Jerusalem onyeeweh, ole ko
juwa ka hirejih bwuh ega nya Oheh Oluhyeh nyam bwuh
epwooheh ba lele. M ka da enyi onyeeweh nya ilom ba
ongoowa inyinyi!

—Owurwu Wurwu 3:12

Ong mí ong ole ko la okwurwu kwurwu bwuh epwu nya
uyah omama nya omimi olala nyamwu le, aale, ongoowa, m
ka ya awurwu onyoowurwuh okerih kerih nya abwela
onyiila nyam kwurwu titi lele. Aale, m ka yile enyi nya
ongoowa hih epwu nya upwu nya ohihi nya Oheh Oluhyeh
kpongħ kpongħ kaka. Aale, enyi nya onto olinyi, m ka yah
da odeheh hiigwuh hiigwuh i-ilahi nya Oheh Oluhyeh Adam
bala i-ilahi nya alegwuh erwu nyamwu inyinyi lele.

—Owurwu Wurwu 3:5

Ong mí ong ole ko la okwurwu kwurwu bwuh epwu nya
uyah omama nya omimi olala nyamwu le, aale, ongoowa, m
ka ya ongiri ha ko ka bá hwuhwu u-uhyeh nya ech
adirahwu nyam tam, jaabwo kaam ayidang la okwurwu
kwurwu kpá wuuh lee, duh kam rwu kaka hwuhwu ta Oheh
Oluhyeh Adam u-uwa u-uhyeh nya ech adirahwu nyamwu
too lee inyinyi.

—Owurwu Wurwu 3:21

Ong mí ong ole ko la okwurwu kwurwu bwuh epwu nya
uyah omama saji nya omimi olala nyamwu le, aale, ongoowa
ka rih ugwu nyam tam. Aale, m ti ka rih Oheh Oluhyeh
nya ongoowa. Aale, ongoowa ti, ti ti ka rih onyi nyam Am
Oheh Oluhyeh le.

—Owurwu Wurwu 21:7

OHEH OLUHYEH JUWA YAH ELA TAHİ E-EPWU NYA AHWU BALA ORWU OPWAPWA

I Ala-Korinti 7:10, 11

Ehileh ole juwa hanu anu angi yeh awule kpa e-epwa. Ma, e-ehileh nya ilom ti ka. Inya Ongolahi ayidang inyi! Ó chila ká ahwu ololohe ka pwa orwu nyamwu kpongħ kpongħ ka. Onyang ahwu onyi ko ti pwa orwu nyamwu eneh le, aale, onyang oowa a rwu kaka rwo orwu okila kaka. O hwuhwu e-ejih ching piih me. Ó rih inyi kaka le, aale, o tiri ekpe kaka ho okpunyih bala orwu onyogoh nyamwu ki rwurwo awule mimi me. Orwu-ahwu ololohe a ti pwa ahwu nyamwu kaka inyinyi.

Ala-Rom 7:2, 3

Ang o-jwuh ejee nya oowa rih-ekee, ehileh kaa wuh onyang ahwu kpa e-ekpelejih nya orwu nyamwu, jaabwo mí abwo ká orwumwu oowa á rih eheh kaka ba odeheh ole. Ma, ó ti rih ká orwu-ahwu oowa á gbuħ eneh le, aale, ehileh ololohe á kaa wuh onyang oowa kpa e-ekpelejih nya orwu-mwu oowa ole ko gbuħ tutum kaka. Inyinyi, o ka la le, ó rih ká ahwu oowa, á ti wulejih rwu kaka rwo orwu okila luka ole ká orwu nya ogbanye nyamwu á gbuħ leka, aale, ehileh nya uya ohoho wuh onyang oowa le. Ma, ó ti rih ká orwumwu á gbuħ eneh le, aale, onyang oowa gbochoh bwuh epwu nya ehileh oowa le, ó rih ko rwo orwu okila rworwo luka oowa, aale, ejeh nya uya ohoho á ke jé-e wuh oo kaka.

Matiyu 5:32

Ma, am kpakpakpa jam binuh yekee, orwu-ahwu onyi mí onyi ole ko pwa ahwu nyamwu le, aale, oleng oowa a wee duh ahwu nyamwu oowa erwu keleh kaka ho uya lele, ko rih ká uya ohoho á rih abwela ohoho nya ahwumwu oowa eneh ka. Oleng onyi mí onyi ole ko keleh kaka yeh ahwu ole ki pwapwa inyi le, aale, uya a we ká oleng oowa ho inyinyi lele.

O-MWU EKPE WE ODEHEH OLE UKA O-HIH EKPE NYA JISOS KRAYIST

Jon 14:3

Uka kam rwu keleh kaka nwula iweh ahwurwu oowa no gbenuh kpá, m juwa ka mwu ekpe wari kaka yenuh kpa rwu ba ilom, saji, ega ole kaam ayidang jih u-uwa piih, anu ka jih tam inyinyi le.

Owurwu Wurwu 3:11

Anu woh me! M juwa ka wari ahyaahi le! Saji nya oowa le, anú-u juwa yubwo chi ang onyiila nyanu ole kanu la we kpa u-uwa gogoh me. Saji ká ongongohe á ka nunuh iweh ahwurwu nya okwurwu kwurwu nya o-ka yeh okpoh okwurwu egbejwuh nya ohihi nyanu owe kpongħ kpongħ kaka me.

Mak 8:38

Saji, ong mí ong ole ko ka juwa jwuh oyih nya o-yah ilomwu da odeheh lala ongo jih oyeh nyam bala erwu onyiila nyam ole, ám odeheh onyobih ole, ká anginyi ilepwu nya-mwu jam jih ekpe da Oheh Oluhyeh jaabwo ká onyang ahwu o-chi la o-hwuh okiletu ha-ka, kaa ho uya ba orwum-wu, aale, am ayidang titi ka jwuh oyih nya o-yah ongoowa da odeheh lala onginyi nyam, uka ole kaam Onyi nya onginyi eheh ole ka mwu ogile wari la ogboh nya Adam bala alegwuh erwu igogo nyamwu.

Matiyu 24:30

Uka oowa, ang o-jwuh ejee nya owewe nyam am Onyi nya onginyi eheh ole a ka hih eheh u-uhyah nyam egbamwu lele. Uka oowa, aluma mí uma nya odeheh ole wuuh ka juwa ba idah. Iwa ayidang wuuh ka juwa kpa ehi nya ilaa ye Onyi nya onginyi eheh ole ayidang, luka ole ko ka hih eheh u-uhyah nyam egbamwu la ongiri bala ebi-ebi otuka otuka nyamwu.

Jemsi 5:8

Le, anú-u titi juwa jwuh ubgoduh tata, kanu mi ká omimi ollokiletu nyanu a la kpakpa inyinyi me, saji uka nya owewe nya Ongolahi la jwuh chwee lume le.

O-MWU EKPE WE ODEHEH OLE UKA O-HIH EKPE NYA JISOS KRAYIST

Anu angi hám há, leelee le, ahi rih anyi nya Oheh Oluhyeh inyilehi le. Ma, jaabwo kahi ka la luka oowa kpangga le, i choo eheh mejeehi leka, Ang ole kahi jé rih-ekee, jaabwo ká Krayist ayidang la kpangga, ahi titi ka la inyinyi luka ole ká Krayist ka mwu ogile wari lele. Saji, uka oowa, ahi ka juwa kpa ehi nyahi ya jaabwo ká Krayist la kpangga le.

—I Jon 3:2

Omih ohe yah ela bwuh epwooheh yekee, Anu woh me! Am Ongolahi juwa ka wari luka o-bwuh anginyi agaga lala oloyih ole ko kaa bwuh ayidepwa agaga le! Ahi owawa ka juwa ha ongole ko juwa kpahi jwu Awurwu okwurwu kwurwu nyanwu ole ko rih abwela onyiila nya Oheh Oluhyeh ohoho, saji ká ongoowa ka jé-e juwa lohi lohi i-ilahi nya Oheh Oluhyeh kaka. —Owurwu Wurwu 16:15

Saji nya oowa le, o chila kaanu ayidang ka juwa nwula il-onu no girih girih, saji uka ole kanu meh iryah kpongħ kpongħ ka, Onyi nya onginyi eheh a ka tiri ekpe wari lele.

—Luk 12:40

Inyi, alegwuh erwu iiwa a bih alirwuḥ nya anginyi iiwa yekee, Anu aleng nya Galiliḥ eeh, i-iye a tí duh kanu godayi riri, jam yoyi keleh ka epwooheh inyi? Anu woh me! Jaabwo kanu kpa ehi nya ilonu ye jaabwo ká Oheh Oluhyeh hwuh Jisos kpa rwu lahi lahi keleh ka epwooheh gedeh gedeh bwuh epwariri nyanu ale wee, inyinyi, Jisos oowa a titi ka tiri ekpe bwuh epwooheh wari we odeheh ole gedeh gedeh la anginyi eheh titi ka jé-e kpa ehi nya ilaa yoo e-ehi luka oowa i-ilahi lele. —Ukwurwo Nya Alerwu 1:11

Saji, am Onyi nya onginyi eheh ole ayidang, juwa ka mwu ekpe wari la ogboh nya Oheh Oluhyeh Adam bala alegwuh erwu, nya o-ka wari kaka nwu ong mí ong urih nya abwela ile wuuh, ká ongongoonwu jam ho odeheh ole le!

—Matiyu 16:27

ELE NYA OHEH OLUHYEH

Luk 21:33

Uhyeh-ogba nya epwoohéh bala odeheh ole ka chipwurwu mí wee. Ma, ela olonu nyam am ayidang á ti ka chipwurwu kpá enenehe kaka.

Matiyu 22:29

Jisos we bih aa yekee, Anu ayidang a la iryah okpapkakpa saji nya Oheh Oluhyeh ka. Saji ánú jé etuh nya ingiile ki da u-Upwu Igogo yeeyee kpongħ kpongħ ka. Leeh, ánú jé jaabwo ká ongiri otuka nya Oheh Oluhyeh kaa bwuh ho ukwurwo kpongħ kpongħ ka inyinyi.

II Pita 1:21

Saji omwu oyeye nyaa ololohe á bwuh la iryah omemeh nya alomwu iiwa ayidang la ilaa kpongħ kpongħ ka. Ma, i yomwu iiwa wuuh da odeheh, jaabwo ká Olegwuh Igogo nya Oheh Oluhyeh juwa kpaa yah kemh.

II Timoti 3:16

Oheh Oluhyeh a kpa anginyi eheh bwuh la Olegwuh Igogo nyamwu da ela mí ela olepwu nya Upwu Igogo le. Upwu Igogo oowa jwuh apyobwunah nya o-kpa me ela je onginyi eheh, bala o-kpa bwurwuh ohobiri nyamwu da odeheh jeh oo, bala o-kpa nwu onginyi riri, bala o-kpa me ela je onginyi e-epwu nya abwela onyiila oho oho nya Oheh Oluhyeh inyinyi.

Ejeh Onyiila 119:11

Ela nyang Ahwu Oheh Oluhyeh, m hwuh kpu ibaa e-epwu nya okiletu nyam saji kam ka ho ohobiri báng ka le.

Ejeh Onyiila 119:105

Ela nyang Ahwu Oheh Oluhyeh rih otinikah ha ata nyam, o ti rih ahigbooh ha ubgħeyi obwubwuh nyam inyinyi.

Published in numerous languages by World Missionary Press, Inc.
as God supplies funds in answer to prayer. **For questions or more
information by country, visit: www.wmp-contacts.org**

Watson Goodman a goh ala ile
tu gwurwuh lala upwu la Ubekeeh le.

Ogahi inyi — Anu ya ra ka.



World Missionary Press
PO Box 120
New Paris, IN 46553-0120 USA
www.wmpress.org

Read booklets online or by App
www.wmp-readonline.org